

KAKANJSKE NOVINE

Informativni list općine Kakanj
www.kakanjske.com

„Kakanjske novine“ su za veliki doprinos u njegovanju slobode govora i razvoju štampanih medija na području općine Kakanj, kao i široj promociji općine Kakanj, 15. aprila 2011. godine, na Dan općine Kakanj, dobile općinsko priznanje "Plaketa sa diplomom"

Izdavač:

Kakanjske novine doo Kakanj

Direktor:

Fikret Kadrić

Glavni i odgovorni urednik:

Faris Sikirić

Redakcija:

Azerin Salihbegović

Ilma Šahman

Edis Škulj

Alina Krivokapa

Sabina Selimović - Šemić

Saradnici:

Ivica Pečić

Evelin Memić

Adib Zekić

Sanela Smajić

Emina Dedić

Nađa Kovačević

Ahmed Kovač

Mirsad Mujagić

Hamid Hadžić

Eldin Omeragić

Emerin Ahmetašević

Mirela Kubura

Elvedin Ibrahimspahić

Fuad Breščić

dr. Emir Demir

Ilma Husika

Komentari i stavovi sadržani u autorskim tekstovima su lični komentari i stavovi autora, a ne nužno i uredništva Kakanjskih novina.

List izlazi svakih 15 dana.

Adresa redakcije:

Šehida br. 5

Kakanj

Telefon/fax:

032 554-878

E-mail:

kakanjske@gmail.com

Fotografije:

Redakcija

Grafička obrada i DTP:

"Artymus" Zenica

(artymusze@gmail.com)

Štampa:

"Labirint" d.o.o. Zenica

(labirintzenica@gmail.com)

List je 08.07.2004. godine, u skladu sa Zakonom o informisanju, a na osnovu rješenja broj 10-40-14367/04 upisan u evidenciju javnih glasila Bosne i Hercegovine pod rednim brojem 41.

Žiro račun:

134-020-0000083244

kod ASA Banke d.d. Sarajevo

BOŠNJACI GLASAJU DA BI IM DRUGI VLADALI

Prema posljednjem popisu stanovništva, u Bosni i Hercegovini živi 3.531.159 stalnih stanovnika. Od toga je 50,11 posto stanovnika koji su se izjasnili kao Bošnjaci, njih 30,78 posto izjasnilo se kao Srbi, a Hrvata je 15,43 posto.

Ne znam za još neki narod koji unutar granica jedne države čine preko 50 posto stanovništva da su u većem rasulu i u situaciji da nad njima drugi vladaju. Iskreno, nije problem u vladavini onih koji su osvješteni kao pripadnici svoje domovine, uvažavajući njeno viševijekovno postojanje, njenu tradiciju, sve različitosti koje se njeguju vijekovima pod bosanskim nebom. Problem, sramota i naivnost Bošnjaka se ogleda u onima koji svojim govorom i djelom, fašističkim ispadima, neznanjem i mržnjom minimiziraju i dovode pod znak pitanja svega što je bošnjačko.

Prvi put se ime Bosna spominje u djelu Konstantina Porfirogeneta u djelu "O upravljanju carstvom", kao područje oko gornjeg toka istoimene rijeke. Na tom području formirala se i bosanska feudalna država kao osnovni geopolitički i etnički okvir Bosne i Bošnjaka. Za vrijeme srednjovjekovne bosanske države najviše se upotrebljava termin „Bošnjani“, nekada sa prefiksom „dobri“, koji označava podanike srednjovjekovne bosanske države. Brojni su historijski izvori koji potvrđuju ovu činjenicu. U Povelji bana Stjepana II Kotromanića iz 1332. godine piše: „Ako Bošnjani budu dužan, a pobjegne iz Bosne s dugom, da mu nije vjere ni ruke od gospodina bana“. U pismu bosanskog kralja Stjepana Tomaševića papi iz 1461. godine navodi se: „Jere, ako Bošnjani budu vidjeli da u ovoj rati neće biti sami i da će im mnogi ini pomoći hrabrije će u rat iti i vojevati.“ U ovom periodu nalazimo i prvi poznati spomen bosanskog jezika i to u notarskom spisu grada Kotora iz 1436. godine.

Pišem ovo jer me se tiče, itekako, kada sa druge strane Drine na državnoj televiziji dotični novinar Marić cirkuzant ponizava one koji su stradanja u BiH preživje-



Piše Ahmed Kovač

liu logorima, čije su slike obišle cijeli svijet. Ruku na srce, ništa drugo se ne može ni očekivati od istih.

A onda još jedan Marić, ovaj put Ivana Marić iz Naše stranke, rođena tu ispod Igmana u Sarajevu izlazi sa govorom o Bošnjacima: "To je nešto novo što su oni izmislili kako bi imali nešto, ne samo muslimani". Ista ta Ivana kandidat je za dogradonačelnicu grada Sarajeva kojoj su istu tu poziciju omogućili glasovi upravo Bošnjaka. Vrlo lahko se može napraviti jako dug spisak onih

koji su se glasovima Bošnjaka afirmisali na političkoj sceni, dok je njihov odnos spram Bošnjacima u najmanju ruku omalovažavajući, da ne kažem fašistički.

Do kada ćemo biti od onih kojima će drugi vladati, kada će naša svijest o nama samima postati svakodnevna kolektivna svijest? Kada ćemo mi pa i svi drugi shvatiti da je Bosna ona zemlja od kada je pomenu Konstantin Porfirogent, srednjovjekovna banovina i kraljevina, u kojoj par stotina metara udaljenosti stoji franjevački samostan i džamija Sultana Mehmeda Fatihha?

Pišem ovo jer papir može da istrpi sve, a progovoriti sa nekim o ovome se svodi na politička međustranačka previranja i slijepo interesno slijedeće određene politike. Nije bitno šta je kazao i uradio već da li je taj neko moj ili nije. Glavna okupacija Bošnjaku je to što je Forto najavio zatvaranje Kantona Sarajevo, a njegova izjava da mu je pomenuta Ivana Marić super, ni šta sve ona implicira, nije ni bitna. Jer, Ivana nek' priča šta hoće, bitno je Bošnji da on može kahve ispijat', odnosno da ih neće moći ispijati ako se krene sa novim mjerama.

Bošnjaci će i dalje, nažalost, glasat', da bi drugi vladali nad njima, na način da im vrijeđaju njihovo postojanje, identitet, jezik i sve što ga čini onim što on jeste, a palit' će se k'o kutnjak za rupu na cesti, jer ta rupa nije dostojna čovjeka XXI vijeka, iako te onaj što si ga izabrao ne smatra čovjekom.

Proces imunizacije protiv COVID-19 na području općine Kakanj

Prvih 20 vakcina protiv COVID-19 za kakanjske zdravstvene radnike

Ne dozvolimo da neznanje, strah i nepovjerenje ovladaju našim izborima i odlukama

U JU "Dom zdravlja" Kakanj, dana 11.03.2021. godine, vakcinisano je 20 radnika AstraZenecinom vakcinom protiv COVID-19. Obzirom da je ovo početak procesa imunizacije protiv COVID-19 na području naše općine, tražili smo da predstavnici JU "Dom zdravlja" Kakanj dodatno pojašne značaj procesa imunizacije protiv COVID-19 koji je cijelom svijetu zadao velike probleme i odnio mnoge ljudske živote.

"COVID-19 je ogromna prijetnja za zdravstveno stanje stanovništva, te je potrebno da se što prije vakciniše veći broj ljudi kako bi se postigao kolektivni imunitet i kako bi se napokon naša svakodnevica vratila u normalu. Kada se razboli neko od zdravstvenih radnika, nije u mogućnosti da radi i pruža ključne usluge pacijentima", navodi direktor kakanjskog Dom zdravlja Tursum dr. Mirsad, spec. neuropsihijatar.

"Vakcine protiv COVID-19 predstavljaju izuzetno važno sredstvo za kontrolu nad pandemijom COVID-19. u kombinaciji s postojećim preventivnim protivepidemijskim mjerama. Sve vrste vakcina protiv COVID-19 su namijenjene postizanju istog optimalnog cilja – dobrog kolektivnog imuniteta populacije na poželjnih 60-79%, čime se jačaju mogućnosti postepenog vraćanja normalnom. Kako je to proces, nesumnjivo da će koronavirus još neko vrijeme određivati naš život. Cilj svih nas u zdravstvenom sistemu je da sačuvamo zdravlje ljudi osiguranjem dostupnosti dovoljno vakcina protiv COVID-19 i vakcinacijom što većeg broja ljudi do postizanja kolektivnog imuniteta, koji će nam omogućiti da možemo živjeti sa koronavirusom na isti način kao i s drugim virusnim bolestima. Zdravstveni radnici su na prvoj liniji borbe protiv pandemije COVID-19. Posebno su ugroženi zdravstveni radnici koji rade na

broj 401, 15.03.2021.



Detalj sa vakcinalnog punkta Kakanj 5

pružanju zdravstvene njege teško oboljelima od COVID-19 i oni koji imaju neko hronično oboljenje. Na kraju, ja ću istaći da nije zanemariv ni rizik od daljeg prenosa sa zdravstvenih radnika na njihove najbliže i ostatak populacije, te je i to jedan od razloga da sačuvamo funkcionalnost zdravstvenog sistema u kojem su sigurni svi, i zdravstveni radnici i pacijenti", pojasnio je kakanjski epidemiolog prof. dr. sc. Aličković Ibrahim.

"Kontinuirana zaštita zdravstvenih radnika od infekcije je jedan od prioriteta zbog toga što je jasno da su zdravstveni radnici izloženi povećanom riziku od obolijevanja od COVID-19, a imaju ključnu ulogu u pružanju njege drugima. Pandemija je ostavila ogroman trag na našim životima, ali je potrebno da budemo optimistični, jer je upravo vakcina protiv COVID-19 ogroman iskorak da se postigne kolektivni imunitet kod stanovništva. Moramo biti svjesni da se proces normalizacije naše svakodnevnice neće desiti preko noći, ali je ohrabrujuća činjenica da će vakcina sigurno značajnije ubrzati

proces vraćanja u stanje u kojem će se ljudi moći nositi sa ovim virusom", navio je pomoćnik direktora za odnose s javnošću u JU "Dom zdravlja" Kakanj Kovačević Nevzet, magistar komunikologije.

"Danas smo započeli sa procesom vakcinacije protiv COVID-19 i nadam se da će, pored ovih prvih 20 doza, vrlo brzo stići i ostale doze vakcine kako bismo mogli vakcinisati sve radnike u Ustanovi. Izuzetno mi je drago što je proces imunizacije pokrenut sa nulte tačke, jer su naši radnici svakodnevno izloženi utjecaju virusa i mogućnosti da se inficiraju", istakla je glavna sestra u JU "Dom zdravlja" Kakanj Džider Emina.

Predstavnici JU "Dom zdravlja" saglasni su sa izjavom iz Instituta za zdravlje i sigurnost hrane Zeničko-dobojskog kantona, u kojoj se naglašava:

"Dosadašnja iskustva pokazuju da se odbijanje vakcinacije najčešće dešava zbog: nepovjerenja prema nauci i tehnologiji, nepovjerenja u društveni i zdravstveni sistem, uticaja medija i društvenih mreža u širenju dezinformacija o naučnim istraživanjima i dezinterpretaciji naučnih saznanja, kao i globalnog trenda jačanja raznih oblika pseudonauke i nadriljekarstva. Ne dozvolimo da neznanje, strah i nepovjerenje ovladaju našim izborima i odlukama. Kada tražimo razloge zašto se ne vakcinisati protiv COVID-19 pokušajmo se prisjetiti slika pandemije COVID-19 širom svijeta, sa milionima zaraženih i skoro dva miliona umrlih od ove bolesti, koja bi vakcinacijom mogla biti spriječena. Naš zdravstveni sistem omogućuje vakcinaciju kvalitetnim i sigurnim vakcinama protiv COVID19, u koje trebamo vjerovati. Vakcinacijom protiv COVID-19 omogućuje se zaštita zdravlja svih nas – štiteći sebe štimito i druge!"

Nađa Kovačević

Epidemiološka situacija nepovoljna VLADA ZDK NALOŽILA PRELAZAK ŠKOLA NA ONLINE NASTAVU

Vlada Zeničko-dobojskog kantona u okviru rasprave o epidemiološkoj situaciji naložila je Ministarstvu za obrazovanje, nauku, kulturu i sport da sve osnovne i srednje škole od ponedjeljka, 15. marta, pređu na online izvođenje nastave.

Resorni ministar Spahija Kozlić rekao je da će online nastava biti izvođena osam radnih dana, nakon čega slijedi proljetni raspust, tako da će škole dvadesetak dana biti izvan žarišta korona virusa.

- To činimo iz preventivnih razloga. Koliko znam škole nisu izvor zaraze, ali postoji sve veći broj nastavnog osoblja, nastavnika i učenika, koji su ili u izolaciji ili su pozitivni na korona virus - rekao je ministar Kozlić, dodajući da će već danas dostaviti uputstvo svim osnovnim i srednjim školama.

Naveo je da je Krizni štab Ministarstva zdravstva ZDK, na osnovu upita ovog ministarstva, izdao preporuku da se do daljnjeg prolongira realizacija Programa obaveznog predškolskog odgoja i obra-

zovanja u osnovnim školama i obdaništimu u ZDK-u.

- Kada će se program realizovati, to definitivno zavisi od situacije sa korona virusom - rekao je Kozlić.

Direktor Instituta za zdravlje i sigurnost hrane u Zenici dr. Senad Huseinagić rekao je da je epidemiološka situacija u ovom kantonu i dalje nepovoljna te da broj oboljelih raste, ali da za razliku od Kantona Sarajevo i Hercegovačko-neretvanskog kantona, rast nije dramatičan.

- To pokazuje da ZDK kao i na početku epidemije uspijeva razvlačiti veliki pritisak na duži period, što umnogome olakšava svim službama koje su povezane, od zdravstvenog sistema, policije, inspekcije, da lakše možemo odraditi svoj dio posla - rekao je Huseinagić.

Naglasio je da bolničke kapacitete i dalje opterećuje značajan rast broja oboljelih sa teškom kliničkom slikom.

- Praćenje podataka u zadnjih mjesec dana pokazuje da je broj umrlih počeo

opadati, posmatrajući sedmodnevne prosjeke, tako da se možemo nadati povoljnijem razvoju, ali epidemiološku situaciju i dalje smatramo vrlo nepovoljnom. Ako uzmemo u obzir situaciju u okruženju, posebno u KS, onda nije za očekivati da će se stanje popravljati, nego da će se i dalje pogoršavati - rekao je Huseinagić.

U ponedjeljak je počela vakcinacija radnika zdravstvenih ustanova, a bolnice u Zenici i Tešnju te 12 domova zdravlja na raspolaganju imaju 740 doza vakcina. Proces vakcinacije trebao bi biti završen danas.

Ministar zdravstva i predsjednik Kriznog štaba Ministarstva zdravstva ZDK dr. Adnan Jupić rekao je da očekuje da će ovom kantonu veoma brzo biti isporučeno 350.000 doza vakcine "Sputnjik-V", koju nabavlja Vlada Federacije BiH, a koje će biti distribuisane širom kantona u skladu sa ranije utvrđenim protokolima.

Press služba ZDK

Kakanjski MGM će obaviti kupovinu ruskih vakcina

Vlada Federacije BiH ušla je u konkretizaciju nabavke vakcina od dva dobavljača, oba za ruske Sputnik V, a cijena je 17 eura po vakcini.

Premijer Fadil Novalić je kazao kako je Ad hoc grupa odradila svoj posao u vezi s prihvatanjem ponuda.

"Četiri kompanije su poslale pet ponuda, a poredale su ih po brzini isporuke, što je nama ključno, kao i po cijenama. Zanimljivo je da su sve cijene iste i iznose 17 eura po dozi", kazao je Novalić.



Novalić: MGM Farm Kakanj dala najbrži rok za isporuku

Premijer Novalić je rekao kako će potpisati dva ugovora, oba za ruski Sputnik i to MGM Kakanj, jer je najkraći rok, tri dana.

"Tri dana za prvi kontingent nakon otvaranja akreditiva, a to može biti nakon potpisivanja ugovora", kazao je Novalić.

Druga ponuda je isto za rusku vakcinu s kompanijom koja ima direktnu komunikaciju.

"Druga je Krajinagroup, ali reakcija je tričetiri sedmice, a isporuka je u više kontingenta", najavio je.

Novalić je kazao da on treba potpisati pismo namjere, da Zavod za javno zdravstvo potpisuje ugovor, a da bi sve trebalo biti gotovo u ponedjeljak te da dostava bude do kraja naredne sedmice.

Dodao je kako će Vlada biti u mogućnosti da nabavi 350.000 vakcina putem ovih kompanija.

"Nije važno koja je vakcina, bitno je koja dođe prva. Vidite ni da istočni ni zapadni svijet više ne kalkulira. S ovom dozom možemo vakcinisati 175.000 ljudi", zaključio je Novalić. **H.H.**

Lijep gest određenog broja uposlenika općinskih službi i uposlenika javnog sektora (općinska javna preduzeća):

Dobrovoljno se odrekli dijela prihoda u svrhu kupovine maski

Zahvaljujući dobrovoljnom izdavanju dijela ličnih prihoda od strane određenog broja zaposlenika općinskih službi i drugih uposlenih u kakanjskom javnom sektoru (općinska javna preduzeća) izvršena je, putem Crvenog križa općine Kakanj, kupovina 5.000 zaštitnih maski koje su distribuirane u kakanjske škole, vrtiće, policijsku stanicu i druge ustanove i organizacije...

Izvršena je i kupovina određene količine sredstava za dezinfekciju.

Svaka kakanjska škola je dobila po 400 zaštitnih maski, policiji je dodijeljeno 200 maski... **Press Općine Kakanj**

GODINA DANA SUŽIVOTA SA KORONAVIRUSOM

Prije tačno godinu dana, pošast u vidu koronavirusa pojavila se i kod nas. U početku, tokom mjeseca marta, na području naše općine nije bilo registrovanih slučajeva oboljelih od COVID-19, ali veliki broj osoba je stavljen pod zdravstveni nadzor gdje im se kontinuirano pratilo zdravstveno stanje i davale sve neophodne smjernice i instrukcije za zaštitu ličnog i kolektivnog zdravlja. Poseban apel je upućivan onima koji su došli iz zemalja ili regija gdje je registrovan i uzeo maha novi korona virus ili su bili direktno ili indirektno povezani sa žarištima unutar BiH, da se obavezno pridržavaju naloženih mjera samoizolacije. Takvima su u Higijensko epidemiološkoj službi JU „Dom zdravlja“ Kakanj data jasna uputstva i savjeti kojih su bili obavezni da se pridržavaju.

„BEZ PANIKE, SAMO POVEĆAN OPREZ“, poručivali su iz kakanjskog Doma zdravlja.

„Apelujem na građane Kaknja da se zaista uozbilje. Nema mjesta panici i strahu i ako se budemo pridržavali uputstava koje daju Operativni tim Doma zdravlja i Opštinski štab civilne zaštite nećemo imati obolijevanja i imaćemo povoljnu epidemiološku situaciju. Međutim, ako ovo shvatimo neozbiljno, onda nam se može desiti da preko noći oboli mnogo ljudi u Kaknju i da imamo tešku situaciju“, apelovao je tada direktor Doma zdravlja Kakanj dr. Mirsad Tursum.

Shodno naredbama Kriznog štaba FBiH, Općinski štab civilne zaštite Kakanj uputio je preporuku kakanjskim vrtićima da obustave rad, zatim poslodavcima da se, u skladu s mogućnostima, omogući odsustvo s posla rizičnim grupama uposlenika (trudnice, bolesni, starije osobe i slično), JP „Vodokom“ Kakanj koje upravlja pijacom da u subotu na pazarni dan, ne rade robna i zelena pijaca, te javnim ustanovama, javnim preduzećima, upraviteljima zgrada i svim drugim subjektima da svakodnevno realiziraju mjere preventivne dezinfekcije prostora o kojima brinu.

12. marta obustavljen je do daljnjeg nastavni proces u svim osnovnim i srednjim školama, te na Univerzitetu u Zenici. Odgojno-obrazovne ustanove su, u skladu sa svojim mogućnostima, organizovale nastavni proces putem interneta.

Krajem marta, u Zeničko-dobojskom kantonu je potvrđeno ukupno 20 slučajeva infekcije virusom COVID-19, od čega 3 slučaja u Kaknju. Općinski štab civilne zaštite Kakanj usvojio je 34 konkretne

naredbe, mjere i preporuke. Veliki broj timova svakodnevno je boravio na terenu gdje je vršio kontrole poštivanja već izrečenih mjera Kriznog štaba FBiH, te izricao sankcije za nepoštivanje mjera izolacije, za nepoštivanje naredbe o zabrani kretanja osoba mlađih od 18 i starijih od 65 godina starosti, te zbog nepoštivanja policijskog sata. Općina Kakanj uputila je poziv svim osobama koje imaju mašinu i iskustvo u krojenju i šivanju da šiju zaštitne maske i zaštitnu opremu, na što su se među prvima svesrdno odazvale žene UŽOK-a, grupa žena iz Tršća i žene džemata Brežani. Takođe, zabilježene su značajne donacije firmi „Plama pur“, „Delibašić poliuretani“, AVA Star i dr. Na lokalitetima ispred pošte i u krugu Doma zdravlja postavljeni su dezinfikacioni tuneli za odjeću, a Crveni križ općine Kakanj je sve svoje kapacitete i resurse usmjerio na pomoć starijim licima u stanju prijekne potrebe.

U velikom problemu zbog korona virusa našli su se brojni poduzetnici, brojni poslodavci su bilježili gubitke, brojni radnici ostali su bez posla, a mnogi nisu znali šta ih čeka kada ova kriza završi. U Kaknju je u jednom periodu zavladała prava panika, kada je usljed velike potražnje došlo do nestašice nekih prehrambenih namirnica, prije svega brašna. U svim firmama poduzete su mjere zaštite, koje su na snazi i danas, godinu dana poslije, i tako je nastavljeno sa prilagođavanjem jednom novom vremenu u suživotu sa koronavirusom. Iako smo očekivali da će se ova noćna mora završiti sa dolaskom ljeta, tek je ovih dana počela vakcinacija, odnosno prvih 20 doza vakcina primili su zdravstveni radnici kakanjskog Doma zdravlja. Nažalost, zbog pogoršane epidemiološke situa-

48 umrlih od COVID-19

Od početka pandemije do danas, na području naše općine ukupno su registrovana 1192 slučaja COVID-19, po čemu smo drugi u Zeničko-dobojskom kantonu, odmah poslije Zenice. Od navedenog broja, 188 slučajeva je aktivno, 10 pacijenata je na bolničkom liječenju i u izuzetno su teškoj situaciji, te je registrovano 48 smrtnih slučajeva uzrokovanih koronavirusom.



Naslovnica Kakanjskih novina od 15.03.2020. godine



Naslovnica Kakanjskih novina od 01.04.2020. godine

cije, ponovo se prelazi na online nastavu, a do daljnjeg je odgođena i realizacija Programa obaveznog predškolskog odgoja i obrazovanja. Očekuje se uvođenje još strožijih mjera.

Prema posljednjim informacijama iz Doma zdravlja Kakanj, na području naše općine od početka pandemije do danas ukupno su registrovana 1192 slučaja COVID-19, po čemu smo drugi u Zeničko-dobojskom kantonu, odmah poslije Zenice. Od navedenog broja, 188 slučajeva je aktivno, 10 pacijenata je na bolničkom liječenju i u izuzetno su teškoj situaciji, te je registrovano 48 smrtnih slučajeva uzrokovanih koronavirusom.

M.S.

Odluke Vlade ZDK o odobravanju finansijskih sredstava

0,34% ZA KAKANJ

Kriterije za odobravanje sredstava zadovoljilo 77 privrednih subjekata sa područja Zeničko-dobojskog kantona, od toga samo jedan iz Kaknja. Od odobrenih 1.144.040,68 KM, za Kaknj samo 3.870,00 KM

Vlada Zeničko-dobojskog kantona je koncem prošle godine donijela niz odluka kojima su odobrena finansijska sredstva namijenjena privrednim subjektima, obrtnicima i proizvođačima sa područja našeg kantona, kao vid pomoći i podsticaja, posebno uzimajući u obzir vrijeme pandemije i otežan rad i poslovanje istih. Pošto se radi o značajnim sredstvima, interesovalo nas je koliko je učešće naše općine, odnosno privrednih subjekata, obrtničkih radnji i proizvođača sa područja naše općine u ovoj raspodjeli.

4 javna poziva vrijedna 2,6 miliona KM

Bitno je napomenuti da je Ministarstvo za privredu Zeničko-dobojskog kantona krajem oktobra prošle godine objavilo četiri javna poziva za odobravanje i dodjelu (refundiranje) sredstava poticaja privrednim subjektima na području ovog kantona, i to:

- Javni poziv za prikupljanje zahtjeva za odobravanje i dodjelu (refundiranje) sredstava poticaja namijenjenih regresiranju kamata na kredite,
- Javni poziv za prikupljanje zahtjeva za odobravanje i dodjelu (refundaciju) finansijskih sredstava namijenjenih subvencioniranju administrativnih troškova kod izgradnje proizvodnih objekata,
- Javni poziv za prikupljanje zahtjeva za odobravanje i dodjelu (refunda-

MINISTARSTVO ZA PRIVREDU ZDK OBJAVILO ČETIRI JAVNA POZIVA ZA DODJELU SREDSTAVA ZA JAČANJE KONKURENTNOSTI PREDUZEĆA

0 28 Okt 2020



Javni pozivi objavljeni krajem oktobra 2020. godine

ciju) finansijskih sredstava namijenjenih subvencioniranju investicija kod obrta iz područja prerađivačke djelatnosti, i

- Javni poziv za prikupljanje zahtjeva za odobravanje i dodjelu (refundaciju) finansijskih sredstava namijenjenih subvencioniranju troškova jačanja konkurentnosti.

Ukupan iznos sredstava namijenjen za ova četiri programa bio je 2,6 miliona KM. Javni pozivi su bili otvoreni 20 dana.

1 od 77

Po isteku roka za prijavu na javne pozive i završene procedure odabira privrednih subjekata po istim, Vlada Zeničko-dobojskog kantona je donijela odluke o odobravanju navedenih sredstava.

Tako su finansijska sredstva u ukupnom iznosu od 18.479,23 KM, namijenjena regresiranju kamata na kredite, dobile firme iz Visokog i Tešnja.

Finansijska sredstva namijenjena subvencioniranju administrativnih troškova

kod izgradnje proizvodnih objekata u ukupnom iznosu od 150.000,00 KM dobilo je 6 firmi, po dvije iz Tešnja i Usore, te po jedna iz Zenice i Žepča.

Vlada ZDK je odobrila (refundirala) finansijska sredstva namijenjena subvencioniranju investicija kod obrta iz područja prerađivačke djelatnosti u ukupnom iznosu 42.919,59 KM. Ova sredstva je dobilo 7 obrtničkih radnji, među kojima je i OR "Pekar Delibašić" iz Kaknja sa iznosom od 3.870,00 KM. Ostali obrti su iz Tešnja (3), Zavidovića, Žepča i Maglaja.

Za 62 poslovna subjekta sa područja Zeničko-dobojskog kantona izdvojeno je skoro 1 milion KM, tačnije 932.641,86 KM namijenjenih subvencioniranju troškova jačanja konkurentnosti. Zanimljivo da od navedenih sredstava, za kakanjske poslovne subjekte nije izdvojena niti jedna marka. Najviše poslovnih subjekata je iz Tešnja (28), zatim Visokog (14), Žepča (10), Zenice (6), te po jedan iz Zavidovića, Usore, Breze i Doboju Juga.

Da rezimiramo: od ukupno 77 privrednih subjekata sa područja Zeničko-dobojskog kantona kojima su odobrena finansijska sredstva po navedena 4 javna poziva, samo jednom privrednom subjektu i to OR "Pekar Delibašić" su isplaćena sredstva i to u iznosu od 3.870,00 KM.

Od namijenjenih 2,6 miliona KM, iskorišteno manje od pola

Iako je, kako je navedeno, bilo predviđeno 2,6 miliona KM sredstava namijenjenih privrednim subjektima, iskorišteno je samo 1.144.040,68 KM. Tako dolazimo do zaključka da je Kaknju od navedene cifre izdvojeno 0,34%, što je poražavajuće.

Šta je razlog navedenom, nećemo nagađati i komentarisati. Ipak, na osnovu svega, logično se nameće nekoliko pitanja: zašto je Kaknj, za razliku od npr. općina Tešanj i Visoko, sa kojima se najčešće poredimo, tako malo dobio; koliko su uopšte privredni subjekti iz Kaknja bili informisani ili zainteresovani o navedenim javnim pozivima; koliko ih se prijavilo a nisu priložili svu potrebnu dokumentaciju ili zadovoljili kriterije; koliko je udruženje privrednika koordiniralo ili trebalo koordinirati navedene aktivnosti; itd.? Kakogod, ispuštena je još jedna prilika da se kantonalnim sredstvima pomogne kakanjskoj privredi, što bi u ovom vremenu pandemije koronavirusa imalo još veći značaj.

M.S.

Dobit Tvornice cementa Kakanj u 2020. porasla 64,5%, na 23,5 miliona KM

Unatoč korona-križi koja je pogodila i BiH, Tvornica cementa Kakanj poslovala je u 2020. s rastom dobiti, prihoda, aktive i kapitala, što se dijelom može pripisati i nastavku građevinske aktivnosti na Koridoru 5c.

Prema podacima iz godišnjeg finansijskog izvještaja, Cementara Kakanj d.d. Kakanj ostvarila je u 2020. neto dobit od 23,54 miliona KM što je za 9,23 miliona KM ili za 64,5 posto više nego godinu ranije kada je dobit iznosila oko 14,31 milion KM, saznaje poslovni portal Profitiraj.ba.

Prihodi kakanjske Cementare, koja posluje u okviru



Prihodi kakanjske Cementare u 2020. su porasli 23,5 posto, na 90,6 miliona KM

njemačke Heidelberg Cement grupacije, lani su iznosili oko 90,65 miliona KM i za 17,22 miliona KM (+23,5%) su veći nego u 2019. godini (oko 73,43 miliona KM). U istom periodu, porasli su rashodi

ove kompanije za 6,35 miliona KM (+11,1%), na 63,70 miliona sa 57,34 miliona KM.

Aktiva Tvornice cementa Kakanj je u 2020. porasla na blizu 169,57 miliona KM što je za 12,6 miliona (+8%) više

nego u 2019. kada je iznosila 156,96 miliona KM.

I kapital Cementare Kakanj porastao je za 9,23 miliona KM (+6,3%), na blizu 154,88 miliona sa 145,64 miliona iz 2019. godine.

Cementara Kakanj je u 2020. imala 202 zaposlena, odnosno jednog radnika više nego godinu ranije.

Prema podacima Registra vrijednosnih papira Federacije BiH, najveći pojedinačni dioničar Cementare Kakanj je CEEM Investment fond iz Holandije sa 93,27 posto vlasničkog udjela, a slijedi ZIF Prof-Plus fond Sarajevo sa 2,69 posto dionica... **Profitiraj.ba**

Borba za opstanak „Rudarske glazbe“ Kakanj

„Rudarska glazba“ Kakanj sa pedesetak svirača koje su okupili Nikola Nevjestić, Đuro Zec i Ivica Grgić, osnovana je 1952. godine. Duhački orkestar Rudnika mrkog uglja „Kakanj“ održao je kontinuitet postojanja svih 68 godina. Međutim, formalno-pravno, od januara 2021. godine, orkestar više ne postoji. RMU i Općina Kakanj zajedno sa članovima orkestra traže način kako iznaći finansijska sredstva da orkestar ponovo nastavi s radom.

„Rudarska glazba“ Kakanj okuplja i mlade i stare, koje instrumentalni spajaju u jedno. Petar Zakušek član je orkestra od njegovog osnivanja početkom pedesetih.

- *Bili smo predgrupa Bijelom Dugmetu u Sarajevu kada su gostovali. Jer ja nisam neki muzičar, za tolike godine ja sam mogao biti Louis Armstrong, ali ne, ja svoje odsviram što trebam, ali smo u glazbi radi druženja. Jer kad gledam ovu omladinu, meni je bilo žao kada je bilo pitanje, hoće li biti glazbe ili neće, nakon toliko godina, kazao je Zakušek.*

Aiša Delibašić u orkestru je šest godina, kaže da je mnogo naučila, te poziva sve mlade muzičke entuzijaste da ne budu na ulici, nego da dođu stvarati sa njima

- *Muzika ispunjava ljude, sa ovim se ne može pogriješiti. Ja bih ovo mogla nazvati drugom porodicom.*



Duhački orkestar Rudnika mrkog uglja „Kakanj“ održao je kontinuitet postojanja svih 68 godina

Ne mogu da zamislim ni nas bez orkestra, ali ni grad Kakanj. Vjerujem da bi bilo пусто, istaknula je Delibašić.

Početkom godine, RMU „Kakanj“ obavijestio je Orkestar rudarske glazbe da zbog restrukturiranja više neće moći finansirati orkestar na način koji je to činjeno prethodnih godina. Odnosno sa 50 hiljada maraka godišnje. Dugogodišnji predsjednik Adib Zekić smatra da je najbolje rješenje da orkestar postane dio Javne ustanove „Kulturno sportski centar“ Kakanj.

- *Da bi se to desilo, potrebno je potpisati tripartitni sporazum, između RMU „Kakanj“, Općine Kakanj i JU „Kulturno sportski centar“. Taj sporazum treba da tretira period od pet godina. A u pet godina orkestar bi narastao do te mjere, da bi se mogao nazvati poluprofesionalni gradski*

rudarski orkestar, rekao je Zekić.

Međutim, općinski načelnik Mirnes Bajtarević, nakon sastanka sa svim stranama, mišljenja je da se „Rudarska glazba“ treba registrovati kao udruženje. Načelnik dodaje da će Rudnik finansijski pomoći, ali i Općina. To predstavnici orkestra ne žele, jer tvrde da iskustva ostalih udruženja ne daju im povjerenje za opstanak.

- *Mi smo iz Općine delegirali, da bi „Rudarska glazba“ trebala da se osnuje kao udruženje građana. Moraju postojati kao pravni subjekt, da bi se mogla transferirati sredstva, kako od Općine Kakanj tako i od RMU „Kakanj, kazao je Mirnes Bajtarević.*

Dok čekaju da njihovi predstavnici riješe formalno-pravne i finansijske probleme, kakanjski muzičari nastavljaju vježbati i stvarati ono što najbolje znaju - muziku. **(Az.S.)**

Općina Kakanj dodjeljuje jednokratne novčane pomoći
Za svako novorođenče 200 do 500 KM

I u 2021. godini Općina Kakanj putem Centra za socijalni rad Kakanj dodjeljuje jednokratne novčane pomoći za svako novorođenče u iznosima od 200 do 500 KM.

Za zaposlene porodilje pomoć iznosi 200 KM za prvorodeno dijete, 250 KM za drugorođeno te 300 KM za treće i svako naredno dijete. Za nezaposlene porodilje pomoć iznosi 250 za prvorodeno dijete, 350 KM za drugorođeno te 500 KM za treće i svako naredno dijete.

Pomoć se dodjeljuje putem Centra za socijalni rad. Kakanj se u smislu isplate naknada porodilja sve češće spominje kao primjer.

Press Općine Kakanj

U Kaknju obilježen 3. mart-Dan Patriotske lige Kakanj

Obilaskom mezarja Šargan, prigodnim programom i polaganjem cvijeća na dvije lokacije u Kaknju je obilježen 3. mart-Dan Patriotske lige Kakanj.

Cvijeće je položeno u Gradskom spomen-parku, te na Mostu šehida, a obraćanja su upriličena ispred spomen-ploče na kući porodice Salihbegović u kojoj je 3. marta 1992. godine, u noći, formirana čuvena četa "Bosna", prva organizirana jedinica Patriotske lige Kakanj.

Prisutnima koji su se okupili ispred spomen-ploče obratio se i načelnik Općine Kakanj Mirnes Bajtarević.

„Od Kaknja se očekivao i danas se očekuje jak patriotski naboj jer i devedestih godina prošlog vijeka, kao i danas, opća logika je upućivala na zaključak da se o državi skrbi i brine sa najviše zebnje i emocije tamo gdje su njeni historijski začeci, tamo gdje su stolovali bosanski banovi i kraljevi, tamo gdje se čuvala bosanska kruna.

Takvo očekivanje u ona teška i neizvjesna vremena Kakanj je ispunio, a smatram da ispunjava i danas.

Na strahovite pritiske, prijetnje, ucjene i ultimativne zahtjeve da BiH bude dio krnje Jugoslavije koja je u suštini bila zamaskirano ostvarenje jednog od probuđenih velikodržavnih projekata, bosanski patrioti odgovaraju ustrajnim zalaganjem za mir i rješenje jugoslovenske krize kroz dijalog. Na području Kaknja zalaganje za mir se ispoljavalo kroz nastojanja da se očuvaju dobri međunarodni odnosi. Održavani su sastanci, potpisivane međustranačke izjave, apelovalo se na mir. Mirno, strpljivo i mudro se reagiralo na uporne demagoške priče o ugroženosti jednog naroda.

Prikupljeno je više od 50.000 potpisa građana kojima se upućivao apel za mir. Kakanjske majke su se pridružile općim zahtjevima da se bosanskohercegovački mladići vrte sa produženog odsluženja vojnog roka jer je bilo jasno da se JNA stavila u službu kreatora politike zločina i agresije.



Obraćanja su upriličena ispred spomen-ploče na kući porodice Salihbegović u kojoj je 3. marta 1992. godine, u noći, formirana čuvena četa "Bosna", prva organizirana jedinica Patriotske lige Kakanj



Odata počast poginulim čija su imena uklesana na spomen obilježju na Mostu šehida

Paralelno sa ustrajnim zalaganjem za mir, bosanski patriotizam nije istovremeno značio i naivnost i slijepo vjerovanje kako sudbinu treba prepustiti na volju kreatorima probuđenih ideologi-

ja koje su u korijenu imale aspiracije na bosanskohercegovački teritorij.

Dan za danom sve je postajalo jasnije da poruke mira ne dopiru do onih koji su pripremali

agresiju sa ciljem nestanka i podjele BiH. Na temelju takvih činjenica nastala je Patriotska liga BiH kao oblik otpora prijetnjama i pokušajima da se spriječi da o sudbini BiH odluče njeni građani putem referenduma kao demokratskog načina izražavanja mišljenja.

Vrijeme je pokazalo da je upravo formiranje Patriotske lige bilo jedan od najvažnijih faktora kojima je spriječeno da Bosna šapatom padne.

Na području Kaknja formiranju Patriotske lige se pristupa odlučno i hrabro. Okolnosti u kojima se nabavljalo oružje, uniforme i materijalno- tehnička sredstva su bile veoma rizične i opasne.

Zbog toga o Patriotskoj ligi i njenim pokretačima i članovima treba govoriti sa posebnim respektom. To je i razlog zbog kojeg mi u Kaknju obilježavamo 1. mart-Dan nezavisnosti BiH i 3. mart-Dan Patriotske lige Kakanj kroz jedan cjelovit, jedinstven i sadržajan program. Naša želja je sačuvati od zaborava period stvaranja Patriotske lige, te kroz takvu aktivnost mlađim naraštajima u srca usaditi snažan patriotizam i odanost državi BiH.

Uz ovakva patriotska promišljanja i poruke, svim pokretačima otpora, svim članovima Patriotske lige u našem gradu i svim patriotski opredijeljenim građanima čestitam 3. mart-Dan Patriotske lige Kakanj", rekao je načelnik Bajtarević.

Podsjetimo, u noći 3. marta 1992. godine, u kući Ibrahima Salihbegovića, Senad Zaimović je okupio petnaestak najpouzdanijih momaka, provjernih patriota i saopštio im da je potrebno formirati jedinicu koja će u slučaju napada agresora stati u odbranu naroda.

Odmah je rečeno da kalkulisanja nema, ko će kalkulisati neka odustane. Niko se nije pokolebao, svi su bili odlučni da brane svoj narod i po cijenu života. Odmah nakon formiranja izvršeno je opremanje jedinice naoružanjem, uniformama i



Položeno cvijeće u Gradskom spomen-parku

materijalno-tehničkim sredstvima, a započela je i obuka.

Osnovna namjena jedinice bila je suprotstavljanje agresiji i zaštita vitalnih objekata na području Kaknja.

Prvi pripadnici čete „Bosna“ koja će svoje ime dobiti nakon prvih uspješnih akcija bili su: Zaimović Senad (komandir), Zaimović Mirsad, Salihbegović Azerin, Delić Halid, Ljubović Samir, Zaimović Senad, Salihbegović Nermin, Salihbegović Edin, Balešić Derviš, Šemić Mustafa, Mušija Ibrahim, Sarač Ibrahim, Tursum Zijad, Haračić Midhat, Čaluk Ertan, Čaluk Jusel, Ljubović Haris i Sarajlić Jasmin. Komandiri čete kroz njen slavni ratni put bili su: Zaimović Senad, Neimarlija Enez, Čaluk Ertan, Haris Ljubović i Ajdinović Dževad.

Prvi zadatak koji je povjeren četi „Bosna“ bio je zarušavanje puta prema Kamenici jer je postojalo saznanje da neprijateljske snage iz Kamenice dolaze u izviđanje na Ponijere. Zadatak je uspješno izveden 4. aprila 1992. godine.

U aprilu 1992. godine jedan dio jedinice zaposjeda vikend-naselje Ponijeri, te vrši izviđanja prema Kamenici, a uspostavljeni su i kontakti sa seoskim stražama u Brnjicu i Patriotskom ligom Zenica. Nakon prvih uspješnih akcija, rahmetli Midhat Haračić četi daje ime „Bosna“, te izrađuje njenu zastavu. „Bosna“ je tada brojala oko 50 boraca. Četa „Bosna“ je 18. maja 1992. godine učestvovala u zaustavljanju kolone JNA koja je krenula iz kasarne u Zenici.

Priča o kakanjskoj ulozi u odbrani BiH ne smije biti ispričana, a da se ne pomene četa „Bosna“. Sve je počelo sa tom hrabrom i poletnom jedinicom koja će nakon prvih dana rata postati dijelom 311. lahke brihade, a potom će se sa cjelokupnim sastavom uključiti u Treći manevarski bataljon, jedinicu koja se proslavila junačkim uspjesima na najtežim ratištima. Četu „Bosna“ činili su, po mnogo čemu sudeći, momci-heroji. Njihovo junačko djelo ne smije biti zaboravljeno.

Press Općine Kakanj

Povodom 8. marta-Međunarodnog dana žena:

UŽOK - kakanjska brigada sa 600 članica

Udruženje žena općine Kakanj (UŽOK) u periodu Odbrambeno-oslobodilačkog rata 1992-1995. godina vrijednim radom iskazivalo je svoja patriotska osjećanja.

Bila je to brigada koja nije bila vojna formacija, ali je bila veoma važna i zaslužna jer je sa svojih 600 članica činila jedan od važnih bedema u odbrani i opstanku.

Za borce na ratnim linijama i ranjenike u bolnicama žene UŽOK-a izradile su 1 520 vunениh jastuka, isplele su 4.000 kapa, 2.000 rukavica, 335 đempera, 190 pulovera...

U akcijama su sakupile 425 čebadi, 631 peškir, 25 šliferi, 14.000 dijelova escajga, 1.629 tanjira, 467 šolja, 350 čaša, te više od hiljadu drugih predmeta za kuhinju. Radilo se i na prikupljanju zimnice...

Žene iz UŽOK-a pomagale



UŽOK je bio na ratištima Trećeg i Sedmog korpusa, stigao je i u Mostar, posjećivani su ranjenici u kakanjskom vojnom stacionaru i bolnici u Zenici...

su u ratnom periodu i izbjeglicama. Bilo je akcija kada se u jednom danu pripadnicima Armije RBiH uručivalo na prvoj

liniji i pet hiljada kolača.

UŽOK je bio na ratištima Trećeg i Sedmog korpusa, stigao je i u Mostar, posjećiva-

ni su ranjenici u kakanjskom vojnom stacionaru i bolnici u Zenici...

Press Općine Kakanj

U povodu obilježavanja 8. marta

Policija poklanjala cvijeće učesnicama u saobraćaju

U povodu obilježavanja 8. marta, Međunarodnog dana žena, a u okviru realizovanja projekta koji u osnovi svog djelovanja ima rad policije u zajednici i partnerstvo sa lokalnom zajednicom, policijski službenici Policijske stanice Kakanj su navedenog dana, prilikom redovnih kontrola u saobraćaju, svim osobama ženskog spola koje su upravljale vozilima ili se nalazile u kontrolisanim vozilima, uručili cvijeće. Ukupan broj



Policijske patrole izmamile osmijehe

podijeljenih i poklonjenih cvjetova simbolizira broj službenika koji trenutno obavljaju poslove i zadatke

policijskih službenika u Policijskoj stanici Kakanj.

Prilikom poduzimanja aktivnosti u okviru ove ne-

svakidašnje i lijepe akcije, uočene su pozitivne reakcije građana i javnosti, a naročito pripadnica ljepšeg spola, kojim su policijske patrole izmamile osmijehe uručivanjem cvijeća, što, mora se priznati, i nije uobičajeno prilikom policijskih kontrola u saobraćaju. Sve navedeno je dovoljan razlog da ove aktivnosti postanu tradicija u postupanju kakanjske policije, a što je i potvrđeno od strane rukovodnih službenika iste. **M.S.**

Moje je PRAVO, a ne PRIVILEGIJA!

Dana 8. marta 2021. godine, zvanično je započeta jedanaesta po redu kampanja „Mjesec dana ženskog romskog aktivizma“ koju provodi ženska romska mreža „Uspjeh“. Kampanja je počela uličnim akcijama u Tuzli, Prnjavoru, Kaknju, Modriči, Visokom i Bijeljini. Kampanjom upozoravamo na izuzetno težak status Romkinja koje se nalaze u diskriminirajućem položaju kada je u pitanju zapošljavanje, nedovoljno učestvuju u političkom odlučivanju i upravljanju u institucijama vlasti, a podaci relevantnih institucija pokazuju da je svaka druga žena doživjela neki oblik nasilja i diskriminacije. Ukazujemo da nismo ravnopravne, naše potrebe i položaj nije vidljiv u javnim politikama, ne osjećamo se sigurno, nismo uključene i živimo život koji nam ne osigurava dostojanstvo.

Kampanja je nastala s ciljem da se kroz niz aktivnosti koje će se implementirati u ovih mjesec dana ukaže na položaj žena s posebnim akcentom na Romkinje u BiH i važnost njihovog uključivanja u javni i politički život naše zemlje te omogućavanje uživanja svih ljudskih prava i dostojanstven život.

Ulična akcija u sklopu kampanje se održala u sklopu regionalnog projekta „Za aktivnu inkluzi-



Ulična akcija u sklopu kampanje u Kaknju

ju i prava Romkinja na zapadnom Balkanu III” koji podržava Austrijska razvojna saradnja kroz CARE International, Balkans.

RAVNOPRAVNOST je moje pravo, a ne privilegija“.

„SIGURNOST je moje pravo, a ne privilegija“.

„VIDLJIVOST je moje pravo, a ne privilegija“.

„UKLJUČENOST je moje pravo, a ne privilegija“.

„DOSTOJANSTVO je moje pravo, a ne privilegija“.

CARE International Balkans Austrian Development Agency

Udruženje Romkinja Centar za majke “Nada” Kakanj

Na Osmi mart o rodno senzitivnom jeziku u našoj školi u kojoj je skoro dvostruko više nastavnica nego nastavnika, ali i učenica nego učenika

Jezik konstruira naše identitete i društvo uopće

U povodu obilježavanja 8. marta, Dana žena, učenice III 1, jezičkog izbornog područja, u svim razredima prve smjene održale su prezentaciju čiji je cilj pokušaj podizanja svijesti o rodno senzitivnom jeziku kao alatu za postizanje rodne ravnopravnosti. To je dio šireg projekta pod nazivom „Rodna senzitivnost jezika u javnom diskursu u Gimnaziji Muhsin Rizvić Kakanj“.

Neposredan povod i poticaj za realizaciju ovog projekta tj. istraživanje rodne senzitivnosti jezika u različitim vidovima komunikacije u našoj školi, odnosno istraživanja postojanja diskriminacije u jeziku, bilo je zapažanje učenice Hane Hadžić da se u školskim obavijestima poput ove „Povodom Svjetskog dana prosvjetnih radnika, svim prosvjetnim radnicima čestitamo ovaj praznik, a posebno profesorima naše škole, koji predano rade svoj posao darujući učenicima znanje...“ upotrebljava samo muški rod, a da se ženski rod samo podrazumijeva. U školi u kojoj je skoro dvostruko više nastavnica nego nastavnika, ali i učenica nego učenika, ovakva upotreba jezika koji nije rodno senzitivna



Učenice III 1 sa prof. Helenom Andrijević osmislile i realizirale ovaj istraživački projekt

prilično je problematična.

U uvjerenju da je neupotreba rodno senzitivnog jezika najčešće nesvjesna i rezultat je ukorijenjene navike i nedostatka svijesti o važnosti korištenja rodno senzitivnog jezika kao odraza ravnopravnosti spolova tj. da nije rezultat mizoginije i svjesne diskriminacije, učenice: Emina Jašarspahić, Sarah Obralića, Ema Balešić, Hana Hadžić, Zerina Pinjić, Emina Hajdarević, Ajna Musić, Selma Delić, Iman Pirić, Nejra Bećirhodžić, Merjem Velispahić i prof. Helena Andrijević osmislile su i realizirale ovaj istraživački projekt. **@gimnazija.kakanj**

U povodu mubarek noći Lejletul miradž Kakanjski imami upriličili specijalni mevludski program

Povodom mubarek noći Lejletul miradž, Medžlis islamske zajednice Kakanj je, u saradnji sa NTV IC, upriličio specijalni mevludski program koji je emitovan na ovoj televiziji, u večernjem terminu, u srijedu, 10. marta tekuće godine. Učesnici programa bili su kakanjski imami na čelu sa glavnim imamom mr. hadži Sulejmanom ef. Čelikovićem, a realizovan je u prelijepom ambijentu džamije u džematu Luka. Uz učenje Kur'ana, ilahija, prigodne recitale i mevluda, vjernici kraj malih ekrana su imali priliku da uživaju u milozvučnim glasovima i osjete dio atmosfere koju su osjećali u vremenu prije pandemije i primjenjivanja epidemioloških mjera, kada su u velikom broju posjećivali džamije u ovoj mubarek noći. Tokom programa proučen je i dio Gaševićovog mevluda o miradžu, u kojem se u stihovima opisuje Poslanikovo a.s. noćno putovanje poznato kao Isra i Miradž.

A to je noć putovanja Poslanika Muhammeda, s.a.v.s., iz Mesdžidul harama u Mekki do Mesdžidul aksaa u Jerusalemu, a potom njegovo uzdignuće u više



Tokom programa proučen je i dio Gaševićovog mevluda o miradžu

nebeske sfere do Sidretul-muntehaa i Kabi kavsejna, mjesta do kojeg niko i nikada, od Allahovih robova, prije nije stigao. Na Miradžu je Muhammed, s.a.v.s., razgovarao sa Uzvišenim Allahom koji mu je pokazao džennet i džehennem, naredio klanjanje namaza i poklonio šefa'at/zauzimanje za oprost ljudima.

Na kraju mevludskog programa prigodnim vazom nasihatom obratio se glavni imam Medžlisa islamske zajednice Kakanj mr. hadži Sulejman ef. Čeliković.

„Naše putovanje kreće sa istigfarom i teobom, iskrenim poklanjem Uzvišenom Allahu dž.š.

Neka noć uzdignuća Muhammeda s.a.v.s bude i noć našeg uzdignuća. Nama je rekao Poslanik da je naš miradž naš namaz. Naš razgovor sa Allahom je kroz namaz, kao što je njegov bio na miradžu. On je dovio rahmet, magfret, blagoslov. Molim Uzvišenog Allaha dž.š. da i mi u ovom svetom mjesecu redžebu i u ovoj blagoslovljenoj noći zadobijemo i Allahovu milost, i magfret, i oprost. Tražimo od Njega pomoć i za nas i za naš evlad, za iskušenja koja su nam trenutno i ona koja će biti, jer bogzna šta nas čeka. Molim Ga da od nas digne svaki musibet i nesreću, iskušenje, koje je trenutno kd



Obraćanje glavnog imama

nas a i u čitavom svijetu, istakao je ef. Čeliković.

Dan Lejletul miradža obilježava se i kao Dan vakifa, dobročinitelja koji sa precizno uvjetovanom svrhom zavještava tj. uvakufjuje svoja dobra, želeći steći Allahovu nagradu i blagoslov. Zahvaljujući vakifima u prošlosti, na prostorima naše domovine nastala su brojna javna dobra, pa čak i gradovi, tako da su vakufi uvijek bili u službi čovjeka, ali i države.

Prigodni kraći programi, prilagođeni epidemiološkim mjerama, upriličeni su u ovoj mubarek noći i u svim drugim kakanjskim džamijama. **M.S.**

Predsjednik Udruženja Ilmije BiH u posjeti OO Ilmije i Medžlisu Kakanj

U ponedjeljak, 08.03. 2021. godine, predsjednik Udruženja Ilmije Bosne i Hercegovine, Nesib ef. Hadžić, boravio je u radnoj posjeti OO Udruženja Ilmije Kakanj, prilikom čega je održao i sastanak sa glavnim imamom Medžlisa IZ-e Kakanj, mr. Sulejmanom ef. Čelikovićem.

Ova posjeta je dio redovnih aktivnosti predsjednika Udruženja Ilmije koji u svom programu ima obilazak svih OO Ilmije kao i svih članova Ilmije prilikom čega želi da neposredno komunicira sa imamima na terenu i od njih čuje informacije, izazove i iskušenja sa kojim se susreću.



Posjeta je upriličena na dan kada se održava redovni seminar imama MIZ-a Kakanj

Predsjedniku Nesibu ef. Hadžiću domaćini su bili glavni imam, mr. Sulejman ef. Čeliković i predsjednik OO Udruženja Ilmije, Mustafa ef. Agić.

Posjeta je upriličena na dan kada se održava redovni seminar imama MIZ-a Kakanj, tako da je bio prisutan veći broj imama i muallima Medžlisa. Prvi dio posjete iskorišten je za obraćanje predsjednika Hadžića koji je u kratkim crtama predstavio misiju i zadatke Udruženja kao i projekte koji se provode u okviru djelovanja Udruženja.

- Pored misijskog djelovanja, koji je zadatak broj jedan, zadatak Udruženja Ilmije jeste da se bori za poboljšanje uslova rada članova kao i radno-pravni status, briga o ugroženim, bolesnim i potrebnim članovima te njihovim porodicama. Stipendiranje djece članova Udruženja, briga o imamima u manjem BH entitetu te o penzionisanim imamima i njihovim udovicama, imamima šehidima, sportskim susretima uposlenika IZ-e, između ostalog je naglasio predsjednik Nesib ef. Hadžić.

U drugom dijelu otvorena je diskusija gdje su imami imali priliku da upitaju predsjednika nešto o organizaciji, djelovanju, uređenju Udruženja ili neko drugo pitanje.

Istaknuto je pitanje o tome kako Udruženje



Predsjednik Hadžić je u kratkim crtama predstavio misiju i zadatke Udruženja kao i projekte koji se provode u okviru djelovanja Udruženja

vodi brigu o imamima u manjem BH entitetu, na što je predsjednik Nesib odgovorio da Udruženje uz pomoć Rijasetu ali i resornih ministarstava pomaže onoliko koliko je u mogućnosti i da i dalje iznalaze rješenja da se kako imamima tako i svim Bošnjacima povratnicima poboljšaju uslovi života u povratničkim džematima.

Predsjednik Nesib ef. je došao i sa poklonom za sve članove OO Udruženja Ilmije Kakanj a to je knjiga: Muslimanska mišljenja i razilaženja o osnovama islamskog vjerovanja, kojoj je izdavač upravo Udruženje Ilmije BiH.

Nakon kratkog druženja, Nesib ef. se zahvalio na prijemu i naglasio da danas ima još jednu posjetu a to je OO Udruženja Ilmije u Prijedoru.

Mr. Elvedin ef. Ibrahimspahić

Arnela Delić, učiteljica koja se bavi različitim kreativnim stvarima i ispunjavanjem želja za najmlađe

Ručno rađeni proizvodi su idealan poklon za posebne prilike

Svakim danom putem društvenih mreža postajemo svjedoci rađanja novih kreativnih ideja naših sugrađana i sugrađanki, kao i njihovih realizacija. U svaku ideju do njene realizacije potrošena je određena suma novca za materijale, uloženo određeno vrijeme, ostavljena duša na svakom proizvodu da bi se na kraju dobio unikatan ručni rad koji će svoje mjesto pronaći u nekom toplom domu. Za ovaj broj za naše čitatelje smo pripremili tekst o jednoj učiteljici koja se odlučila baviti različitim kreativnim stvarima i ispunjavanjem želja za one najmlađe.

KN: Evo, najprije nam kaži ko je Arnela i našim čitaocima objasni šta je to čime se baviš?

Arnela: Zovem se Arnela Delić, živim u Kaknju, imam 31 godinu. Po zanimanju sam profesor razredne nastave i trenutno se bavim izradom unikatnih ukrasnih kutija za velike i male, dječjih polica, table i podmetača, sinija, kolijevki za lutkice, kartonskih torti, explosion box-ova, slatkih poklončića. Prije izrade svih ovih stvarčica radila sam u školi kao učiteljica, a sada trenutno kod kuće uživam u ulozi majke, izradi ukrasnih kutija i polica za odrasle i djecu.

KN: Koliko dugo to radiš, kako si pored



Kreativne drvene police sa motivima po želji kupaca za najmlađe



Možete odabrati i unikatne table u kombinaciji sa podmetačima za šolje ili čaše rađeni dekupaž tehnikom

svih obaveza kao majka uspjela zauzeti se za nešto što traži mnogo vremena i truda?

Arnela: Na ideju da izrađujem sve ove stvarčice došla sam prije nekoliko mjeseci, ali oduvijek sam imala želju da se bavim izradom ukrasnih kutijica za sve one male sitnice koje čuvaju drage uspomene. Prvo sam za-

počela izrađivati ukrasne kutije i police za malene djevojčice i dječake mojih prijateljica koje su mi, oduševljene mojim radom, predložile da napravim svoju stranicu za prodaju svih ovih sitnica. Trebalo mi je vremena da se odlučim na taj korak, što sam na kraju i učinila. Također, već neko vrijeme ne radim, tačnije otkako

sam postala majka, pa sam ujedno htjela iskoristiti "višak" slobodnog vremena.

KN: Možeš li nam objasniti postupak izrade? Koliko vremena je potrebno za izradu npr. jedne police, jednog explosion boxa, jedne karton torte i slično?

Arnela: Ukrasne kutije izrađujem od medijapana, a zatim ih ukrašavam akrilnim bojama, salvecicama raznih motiva, rižinim papirom, ornamentima, mdf ukrasima, Eva pjenom, tilom, cirkonima, perlicama, mašnicama. Sve zavisi od želje kupaca, a sve se može napraviti po želji. Sam proces izrade jedne ukrasne kutije, police, table ili podmetača traje veoma dugo i zahtjeva punu pažnju, kao i svaki drugi ručni rad.

KN: Gdje nabavljaš potrebni repromaterijal? Može li se živjeti od ručnog rada i šta određuje cijenu jed-



Arnela Delić

nog tvog proizvoda?

Arnela: Od izrade svih ovih stvarčica se ne može živjeti, pogotovo zato što smo mi mala sredina, a ručni rad kod nas nije na cijeni. Za početak, treba puno uložiti u materijal koji nije jeftin, a uzto slabo gdje imamo priliku promovirati ono što radimo. Materijal nabavljam u prodavnicama repromaterijala za male i velike kreativce. Bez obzira na određene poteškoće, ipak se nešto izrađuje, pa se na kraju nešto i zaradi. Cijena svakog proizvoda zavisi od njegove veličine, uloženog materijala i vremena.



Police se izrađuju i za dječake i djevojčice



U ponudi su i explosion boxovi punjeni slatkišima po želji, kao i torte od kartona



U sastavni dio ponude idu i unikatne kutije rađene dekupaž tehnikom, za prve uspomene najmlađih ili za odrasle

KN: Zašto bi neko trebao odabrati baš tvoje proizvode za svoj kutak?

Arnela: Svoje proizvode bih preporučila svima koji žele imati nešto posebno, unikatno, lijepo i jedinstveno u svom domu kao dekoraciju, nešto što ne mogu kupiti bilo gdje. Također, ručno rađe-

ni ovakvi proizvodi su idealan poklon za posebne prilike, kao što su rođendani, Dan žena, vjerski praznici, godišnjice, Dan zaljubljenih. U takvim posebnim prilikama, s ovakvim poklonom sigurno nećete pogriješiti, jer će to biti originalan poklon u koji je uložen trud, vrijeme i ljubav.

KN: Imaš li nekih planova za skoriju budućnost?

Arnela: U budućnosti bih željela da imam još više inspiracije i još bolje ideje za izradu navedenih proizvoda. Cilj mi je promovirati ručni rad i upoznati ljude s onim što radim. Voljela bih da nas ljudi više prepoznaju i da više cijene naš domaći proizvod.

KN: Kako te zainteresovani klijenti mogu pronaći?

Arnela: Moje proizvode možete pogledati i naručiti na facebook stranici „Moj poklon by Nella“, nadam se u skorijoj budućnosti i mogućnosti otvaranja svog shopa.


Ekipe Kakanjskih novina ti se zahvaljuje na odvojenom vremenu i želi puno uspjeha na privatnim i poslovnim planovima.

Razgovarala:
Alina Krivokapa

U PRODAJI JE NOVA KNJIGA
HAFIZA HUSEJNA ČAJLAKOVIĆA

LIJEČENJE SAMOG SEBE

OD SIHIRA, UROKA I OSTALIH
DUHOVNIH BOLESTI



Hfz. Husejn Čajlaković

NARUČITE PO AKCIJSKOJ CIJENI:

KOMPLET KNJIGA
DEVET RAZLIČITIH NASLOVA



Menadžment i distribucija
knjiga: 061 / 563 - 453

novela doo
Novela
Knjižara

Veliki asortiman knjiga, školskog pribora, kancelarijskog materijala, te računara i računarske opreme.

novela doo
Novela
Turizam

Kroz naša putovanja kreiramo jedinstven doživljaj za sve klijente i bivamo razlogom drugačijeg pogleda na svijet.

novela doo
Novela
Edukacija

U saradnji sa profesorima i školama, nudimo spram potreba grupe: kurseve informatike i stranih jezika.

novela doo
Novela
Računovodstvo

Ako ste u potrazi za knjigovodstvenim i računovodstvenim uslugama na pravom ste mjestu. Novela doo Vam nudi sve vrste računovodstvenih usluga.

novela doo
Novela
Usluge

Pravne usluge
Softver (savjetovanje i nabava)
ERP implementacija
Poslovno savjetovanje
Pantheon

novela doo
Novela
Osiguranje

Registrujte Vaše vozilo u jednoj od osiguravajućih kuća: ADRIATIC, ASA I EUROHERC OSIGURANJE. Svu potrebnu proceduru završavamo profesionalno, ekspeditivno i bez stresa.

Shodno Sporazumu broj: 02/1-1269/21 od 26.02.2021. godine, potpisanom između Općine Kakanj i NVO „Muslim Aid“ Sarajevo, a vezano za Projekat „Ekonomsko osnaživanje socijalno i materijalno ugroženih osoba i mladih osoba kroz proizvodnju povrća u plastenicima“, u kojem su osigurana donatorska sredstva od strane NVO „Muslim Aid“ Sarajevo u iznosu od 40%, Općine Kakanj u iznosu od 48% i vlastitog učešća korisnika u iznosu od 12%, a u cilju razvoja plastične proizvodnje na području općine Kakanj, **Općinski načelnik raspisuje:**

JAVNI POZIV

za predaju zahtjeva za dodjelu plastenika površine 100 m² sa dodatnom opremom uz sufinansiranje projekta

I PRAVO UČEŠĆA

Pravo na učešće u Projektu imaju socijalno i materijalno ugrožene osobe i mlade osobe sa područja općine Kakanj koje posjeduju vlastito poljoprivredno zemljište ili njihovi uži članovi porodice kao i zemljište ustupljeno na korištenje ili u zakup u neposrednoj blizini stambenog objekta u kojem stanuju.

II USLOVI ZA DODJELU PLASTENIKA

Podnosilac zahtjeva treba da ispunjava slijedeće uslove:

1. da je nezaposlena osoba ili osoba sa minimalnim primanjima sa prebivalištem na području općine Kakanj,
2. da je upisan u Registar poljoprivrednih gazdinstava i klijenata u Općini Kakanj i da je izvršio ažuriranje podataka za 2021. godinu ili će pokrenuti postupak upisa, a što će potvrditi ovjerenom izjavom da će se upisati u Registar poljoprivrednih gazdinstava i klijenata prije dodjele plastenika,
3. da je podnosilac zahtjeva ili član uže porodice vlasnik ili posjednik poljoprivrednog zemljišta pogodnog za plastičnu proizvodnju ili da je poljoprivredno zemljište pogodno za plastičnu proizvodnju uzeto na korištenje ili u zakup i da se isto nalazi u neposrednoj blizini stambenog objekta u kojem stanuju,
4. da ima mogućnost navodnjavanja plastenika,
5. da u trenutku predaje zahtjeva za učešće u ovom pozivu nema više od 100 m² plastenika u svom posjedu ili posjedu uže člana domaćinstva,
6. da sufinansira 12% od nabavne cijene plastenika sa dodatnom opremom (345,00 KM),
7. da obavezno prisustvuje edukaciji iz oblasti plastične proizvodnje u trajanju od dva dana.
8. da u posljednje tri godine nije ostvarivao-la pravo na donaciju, dodjelu ili sufinansiranje nabavke plastenika od Općine, ministarstava, humanitarnih i drugih organizacija,
9. da će dobiti plastenik zadržati u vlasništvu najmanje 2 godine od potpisivanja Ugovora.

Općina Kakanj i NVO „Muslim Aid“ Sarajevo su nosioci aktivnosti vezanih za realizaciju Projekta.

III KRITERIJI ZA DODJELU PLASTENIKA

Kriteriji za bodovanje podnosioca zahtjeva:

a) pogodnost poljoprivrednog zemljišta za plastičnu proizvodnju i mogućnost navodnjavanja (utvrđuje Komisija za dodjelu plastenika na licu mjesta), 1-3 boda,

- parcele sa nagibom, udaljenost od stambenog objekta više od 200 m - 1 bod,
- parcele sa blagim nagibom, udaljenost od stambenog objekta do 100 m - 2 boda,
- parcele - ravan teren i blizu stambenog objekta, dobar pristup - 3 boda.

Kandidati kod kojih se na terenu utvrdi da parcele ne ispunjavaju gore navedene pogodnosti i nemaju mogućnosti za navodnjavanje plastenika neće se bodovati, te se njihove prijave neće uzeti u razmatranje.

b) dodatni bodovi po osnovu pripadnosti jednoj od dole navedenih kategorija:

- podnosilac zahtjeva nezaposlena osoba i koja se nalazi na evidenciji Biroa za zapošljavanje – 2 boda
 - za svakog punoljetnog nezaposlenog člana porodice, koji se nalazi na evidenciji nezaposlenih osoba Biroa za zapošljavanje – 1 bod,
 - za svakog izdržavanog člana porodice (nezaposlene osobe koje se ne nalaze na evidenciji nezaposlenih osoba na Birou za zapošljavanje - domaćice, djeca, učenici i sl.) – 1 bod,
- podnosilac zahtjeva mlada osoba životne dobi do 35 godina – 5 bodova,
- ako je podnosilac zahtjeva samohrani roditelj – 2 boda,
- ako je podnosilac zahtjeva ili uži član domaćinstva (dijete ili bračni drug) osoba sa invaliditetom - 2 boda.
- Ukupan prihod domaćinstva:
 - bez primanja - 7 bodova,
 - ako su primanja po članu domaćinstva do 100,00 KM - 4 boda,
 - ako su primanja po članu domaćinstva do 200,00 KM - 3 boda,
 - ako su primanja po članu domaćinstva do 250,00 KM - 2 boda,
 - ako su primanja po članu domaćinstva do 300,00 KM - 1 bod,
- socijalni aspekt (stanje na terenu, imovno stanje, opći dojam i sl.) od 0 - 3 boda

Kada kandidati pri bodovanju imaju isti broj bodova, prednost će imati kandidati koji imaju status mlade osobe, te višečlane porodice i veći broj nezaposlenih u porodici.

IV POTREBNA DOKUMENTACIJA

Potrebna dokumentacija za dodjelu plastenika:

1. zahtjev za prijavu na Javni poziv,
2. CIPS prijavnica podnosioca zahtjeva (original ili ovjerena kopija),
3. ovjerena kućna lista,
4. dokaz o nezaposlenosti kandidata izdat od Biroa za zapošljavanje,
5. dokaz o nezaposlenosti svih punoljetnih članova porodice izdat od Biroa za zapošljavanje ili neki drugi dokaz o nezaposlenosti (kopirana zdravstvena knjižica),
6. potvrda o visini primanja zaposlenih članova domaćinstva kao i potvrda (ček) o primanju penzionera ukoliko je isti član domaćinstva,
7. potvrda o upisu u RPG i RK iz 2021.godine, izdata od nadležne Službe Općine Kakanj ili ovjerena izjava da će se upisati u Registar poljoprivrednih gazdinstava i klijenata prije dodjele plastenika,
8. vlasništvo ili posjed nad parcelom koja se namjerava koristiti za instaliranje plastenika (kopija ZK izvodka ili Posjedovnog lista, kao i ugovor o zakupu/ korištenju parcele), ili izjava o davanju zemljišta na korištenje bez naknade iz RPG i RK,
9. dokaz da je samohrani roditelj (smrtni list ili dokaz o razvodu braka ili drugi dokument kojim aplikant može dokazati da je samohrani roditelj),
10. dokaz da je podnosilac zahtjeva ili uži član porodice (dijete ili bračni drug) osoba sa invaliditetom (potvrda ili drugi dokument kojim aplikant dokazuje da je osoba sa invaliditetom),
11. ovjerena izjava da u trenutku predaje zahtjeva za učešće u ovom pozivu nema više od 100 m² plastenika u svom posjedu ili posjedu uže člana domaćinstva,
12. ovjerena izjava da će korisnik podsticaja dobiti plastenik zadržati u vlasništvu najmanje 2 godine od potpisivanja Ugovora,
13. ovjerena izjava da podnosilac zahtjeva u posljednje 3 godine nije ostvario pravo na donaciju, dodjelu ili sufinansiranje nabavke plastenika od Općine, ministarstava, humanitarnih i drugih organizacija,
14. ovjerena izjava da će sufinansirati 12% od nabavne cijene plastenika sa dodatnom opremom (345,00 KM), te da će obavezno prisustvovati edukaciji iz oblasti plastične proizvodnje u trajanju od dva dana.

Potrebna izjava za uslove pod rednim brojevima 11., 12., 13. i 14. se podnosi na zajedničkom obrascu „IZJAVA“, koja se može preuzeti na prijemnoj kancelariji Općine Kakanj.

V PROCEDURA ODABIRA KORISNIKA

Komisiju za odabir krajnjih korisnika za dodjelu plastenika sa dodatnom opremom uz sufinansiranje projekta u saradnji sa NVO „Muslim Aid“ Sarajevo čine: 1 predstavnik NVO „Muslim Aid“ Sarajevo, 2 predstavnika Općine Kakanj i 1 predstavnik Saveza poljoprivrednih udruženja „KAP“ Kakanj.

Zadatak Komisije za dodjelu plastenika je da izvrši:

- pregled prispjelih prijava, provjeri upis u RPG i RK u nadležnoj službi, evidentira kandidate koji ispunjavaju uslove iz Javnog poziva, obave uvidaj na licu mjesta, boduju kandidate na osnovu kriterija iz Javnog poziva, te sačine rang listu krajnjih korisnika na osnovu utvrđenih kriterija za bodovanje i istu dostave Općinskom načelniku i NVO „Muslim Aid“ Sarajevo.

Saglasnost na predloženu rang listu krajnjih kandidata daje Općinski načelnik i NVO „Muslim Aid“ Sarajevo.

Kandidati koji su podnijeli zahtjev za dodjelu plastenika biće pismeno obavješteni o rezultatima Javnog poziva.

NAPOMENA:

Obrasci zahtjeva za prijavu se mogu preuzeti na Info-pultu Općine Kakanj (šalter sala) i zajedno sa dokumentacijom predati u zatvorenoj koverti na protokol Općine Kakanj sa naznakom „Za javni poziv za dodjelu plastenika sa dodatnom opremom“ - NE OTVARATI“.

Krajnji rok za podnošenje zahtjeva na Javni poziv je 31.03.2021. godine od 15:30 sati.

Sve dodatne informacije mogu se dobiti u Službi za privredu, urbanizam i zaštitu okoline Općine Kakanj, Odsjek za lokalni ekonomski razvoj, I sprat ili na broj telefona 032/771-828 svakim radnim danom od 07:00-15:30 sati.

Nepotpune i neblagovremene prijave se neće uzeti u razmatranje.

OPĆINSKI NAČELNIK
Mirnes Bajtarević

Belma Duraković, studentica IPF-a Zenica

Ulaganje u znanje je najveća investicija

Upoznajte Belmu Duraković, ona ima 20 godina. Iz Kaknja je gdje je završila osnovnu školu. Srednju Medicinsku školu završavala je u Zenici 2019. godine. Nakon toga odlučuje upisati Islamski pedagoški fakultet Univerziteta u Zenici, Odsjek za inkluzivnu edukaciju. Trenutno je druga godina ovog fakulteta. Otkrila nam je da su njen hobi putovanja, plivanje kao i čitanje knjiga. Kako kaže, ona na taj način pronalazi psihički odmor koji je preduslov za produktivno učenje što je svakako važno. Pitali smo je o njenom početku školovanja, njenim počecima, poteškoćama sa kojima se susreću mnogi studenti, kao i radostima i uspjesima. Evo šta nam je otkrila naša Kakanjka Belma.

Opišite sebe u 5 riječi?

- *Tvrđoglava, organizovana, koncentrisana, jako uporna i nježna. Nekako u najkraćim crtama, to sam definitivno ja.*

Vaše medalje, priznanja, certifikati, učešća u nekim projektima, značajnim programima?

- *Tokom praktičnog rada u različitim zdravstvenim ustanovama susretala sam djecu koja imaju različite razvojne poteškoće. Tada mi je to izazivalo neugodu jer nisam znala na koji način da im pomognem, a da ih ne povrijedim i da ne osjete poniženje. Kada je došlo vrijeme da odlučujem o daljem školovanju, odlučila sam da podršku i svoje vrijeme posvetim upravo takvoj djeci. Zaista, mogu reći da su to posebna bića! Odsjek za inkluzivnu edukaciju je novi odsjek na Islamsko pedagoškom fakultetu Univerzitetu u Zenici po uzoru na Edukacijsko-rehabilitacijski fakultet u Tuzli. Za prvu akademsku godinu nagrađena sam Poveljom dekana za najbolji postignuti uspjeh sa prosjekom ocjena 9,66. Osim toga, dobitnica sam i posebne diplome za odličan uspjeh u toku srednjoškolskog obrazovanja. Trenutno sam predstavnica Odsjeka za inkluzivnu edukaciju i aktivan član Vijeća studenata Islamskog pedagoškog fakulteta u Zenici.*

U toku osnovnog obrazovanja, bila sam uključena u internacionalnu organizaciju World Vision gdje sam učestvovala u brojnim radionicama sa ciljem upoznavanja i poštovanja „različosti“. Prošle godine sam bila učesnica #CodeLikeITGirl dvodnevno haka-tona u Sarajevu.

Odakle interesovanje za Vaš poziv/školu? Je li bilo promišljanja i razmišljanja šta i kako dalje poslije srednje škole?

- *Obzirom da se radi o teškom i veoma značajnom koraku u životu, uvijek postoji mnogo razmišljanja, što je po mom mišljenju i opravdano. Taj put je tekao nekako sa puno teškoća, jer svaka osoba koja želi pomoći u broj 401, 15.03.2021.*



Belma Duraković, dobitnica Povelje dekana s prosjekom 9,66

odluci je različita ili predlaže neke vlastite neostvarene snove. Međutim, mnogo ljudi i ne poznaje šta konkretno znači termin „inkluzija“ i najteže mi padaju reakcije društva kada spomenem taj termin. Uvijek se vodim time da su putevi do uspjeha možda gorki, ali itekako donose „slatke plodove“. Ljubav prema ovom pozivu se javila i ranije nego što sam mislila, prilikom sumiranja informacija i retrospekcije na dosadašnja iskustva, i već u osnovnoj školi učestvujem u obilježavanju Svjetskog dana autizma, drugog aprila. Za istu temu se interesujem u srednjoj školi u sklopu predmeta Socijalna medicina. Negdje postoji neka nit koja me je uvijek vezala za ovu djecu. Zbog toga sam tu gdje jesam, sada već na drugoj godini studija.

Koliko je bilo potrebno ulaganja i odricanja da biste postigli odlične rezultate na fakultetu?

- *Sve što vrijedi i sve što nas čini ponosnim, traži dodatnu pažnju i vrijeme. Mnogo je ulaganja, napora, upornosti ali i strpljenja potrebno da bismo postigli odlične rezultate. Zaista je potrebno odreći se mnogočega kako bi se sve stiglo i sa najboljim rezultatima. Svaki put ka uspjehu je trnovit ali svjesna sam toga te se veoma dobro borim s tim. Bez uložnog vremena i truda teško je postati brilijantan student. Dobra organiziranost i volja igraju ključnu ulogu na ovome putu.*

Vaša životna vodilja i podrška?

- *Moja životna vodilja jeste da budem najbolja verzija sebe, da ulažem u vlastitu kogniciju i vjerujem u svoje kompetencije. Zaista, ono što svaka osoba treba sebi priušti-*

ti jeste samopoštovanje, ljubav za svaku karakteristiku svoje ličnosti, uspjeha, različitosti kao i vrednovanje svih blagodati koje imamo u svakodnevnom životu. Ponekad svakom čovjeku dođe period manjka motivacije, tada moja najveća podrška su moji roditelji i moja sestra. Sestra mi je oduvijek bila „iza leđa“, gurala bi uvijek sa mnom Sizifov kamen. Prije mene je završila studij te je uvijek puna savjeta koje daje iz ličnog iskustva.

Koja je tajna Vašeg uspjeha i šta biste savjetovali sadašnjim studentima? Kakve su Vaše poruke mladima i planovi?

- *Tajna mog uspjeha jeste optimistički pristup svakom problemu uz vjeru da je sve moguće, samo da ne trebamo odustati. Svaki cilj koji želimo, neka bude uz dozu ljubavi i vjere, jer tako ćemo sigurno uspjeti. Naravno, za svaki uspjeh je bitna organizacija, trud i mnogo rada.*

Svim budućim studentima poručila bih da ulažu u vlastito znanje, da odaberu zanimanje u kojem će uživati i koje će im buditi unutrašnju motivaciju. Jer kako jedan Kineski filozof kaže: „Izaberite posao koji volite, i nećete morati da radite nijedan dan do kraja života“.

Da li ste razmišljali o odlasku iz BiH ili vidite perspektivu ovdje u domovini?

- *Kao i svaka druga osoba, svjesna sam teške situacije u našoj državi kao i mnogo loše pozicije mladih obrazovanih osoba.. Ukoliko, nakon završenog studija budem imala problem pri zaposlenju i ukoliko taj problem bude dugotrajan, morat ću potražiti posao van granica ove države. Veliki sam patriota ali sam zagovornik da svako ide tamo gdje mu je bolje i tamo gdje bi jače mogao „zasijati“.*

Kako vidite sebe u budućnosti?

- *Sebe vidim kao osobu koja će vraćati osmijeh na lica majki koje su zabrinute zbog neprihvatanja i segregacije njihovog djeteta u društvu. Zajedno sa svojim kolegama ću raditi na promovisanju podrške i podizanja svijesti o djeci i osobama koje imaju poteškoće u razvoju. Moja vizija je da idem do najviše stepenice znanja u svojoj struci. Čovjek uči dok je živ. Što više znanja i iskustva steknem, time ću pružiti veću produktivnost u svom poslu.*

Poruka za kraj?

- *Bez obzira na stanje u državi, svakom bih preporučila da izabere put znanja. Na putu znanja stvaraju se najveća djela, nižu se titule i njima se stiže do trona. Ulaganje u znanje je najveća investicija, investicija za cijeli život. Također bih poručila svim građanima da pruže podršku svakom djetetu i da imaju na umu da je svako dijete različito i jednako vrijedno bez obzira na, možda, jedan hromozom viška...*

Hamid Hadžić

VJENČANJA KAKANJACA U SIDŽILU VISOČKOG KADIJE IZ 1822-1823. GODINE

U Historijskom arhivu Sarajevo postoji više sačuvanih sidžila/knjiga i protokola Visočkog nijabeta iz 19. stoljeća, odnosno ogranka suda koji je administrativno pripadao Sarajevskom kadiluku. Najstariji sačuvani sidžil je iz 1822. godine, a najmlađi su s početka austrougarske administracije, od 1878. do 1893. godine, njih ukupno četrnaest. Sudske knjige od 1883. do 1893. godine su, ustvari, bilješke sudskog protokola iz kojih se, također, mogu uzeti vrijedni podaci, ali bez posebnih detalja o presudama i rješenjima koji su se nalazili u originalnim knjigama koje, nažalost, nisu sačuvane. Prethodno smo naveli vjenčanja Kakanjaca iz sidžila visočkog kadije za period 1826-1829. godine čiji se original čuva u Zavičajnom muzeju Visoko. Ovom prilikom donosimo podatke o vjenčanjima Kakanjaca i Kakanjki iz perioda 1822-1823. godina:

Jusuf, sin Mehmeda, iz Crnča i Mulija Zahirović iz Lipnice

„Suprug Jusuf, sin mula Mehmeda, imama iz sela Crnač, kojeg zastupa Hurem, sin Jašara, Kubat iz istog sela, ponudio je brak punoljetnoj i prethodno neudavanoj Muliji, kćerki Osmana, (Zahirović) iz Lipnice, koja lično prisustvuje. Uz obostrano dogovoreni mehri-muedždžel/vjenčani dar u iznosu 6.555 akči sklapanju brak. Svjedoci: Abdulah-aga Ajan, Abdulkadir-aga, Arif-aga, Sarajlija Mula Mehmed Haseki-zade (Hasečić), Sulejman Dedić, djevojčin otac Osman (Zahirović) iz Lipnice.“

Abdulkadir Kubat iz Crnča i Aiša kći Fazlije iz Zlokuća

„Nakon što je svjedoče-



njem dokazano daje Mehmed, sin Hasana, umro, suprug Abdulkadir, sin Jašara, (Kubat), iz Crnča, kojeg zastupa Avdija, sin Jašara, (Kubat), iz istog sela, ponudio je brak prethodno udavanoj Aiši, kćerki Fazlije, iz Zlokuća, koju zastupa Ibrahim-paša, sin Avdije, iz Semetiša. Njihove punomoći su potvrđene svjedočenjem Osmana, sina Husejna, (Šemića), iz istog sela i Mustafe, sina Jašara, (Kubata), iz Crnča. Dogovoren je vjenčani dar u iznosu od 5.000 akči, te je brak sklopljen 17. rebiul-ahira 1237. po H/11. januara 1822. godine. Svjedoci: Arif-aga i ostali.“

Abdulah Ganić iz sela Popa i Lejla Bećirhodžić iz Bukovlja

„Suprug Abdulah, sin Abdulganije, (Ganić), iz sela Popi u Zgošći, kojeg zastupa njegov otac Abdulganija, ponudio je brak budućoj prethodno neudavanoj i punoljetnoj supruzi Lejli, kćerki, Omera Bećirhodžića iz sela Podbukovlje, koje pripada zijametu Zgošća, a koju zastupa njen brat Alija, sin Omera, iz istog mjesta. Njihove punomoći su potvrđene svjedočenjem Ibrahima, sina Ismaila, Đokića i Bektaša, sina Bege, iz Popa. Na obostrano zadovoljstvo dogo-

voren je vjenčani dar u iznosu 13.000 akči. Svjedoci: Ahmet-aga, Arif-aga, Hasan Alemdar Burić, Salih-beg iz Arnautovića, Mustafa iz Sarajeva i ostali.“

Šaćir, sin Abdulkadira, i Hava, kći Mustafe, iz Nažbilja

„Suprug Šaćir, sin Abdulkadira, iz Nažbilja, koji lično prisustvuje, ponudio je brak Havi, kćerki Mustafe, iz istog sela, koju zastupa Kadrija-paša, sin Mehmeda. Njihovo zastupanje potvrđeno je svjedočenjem Ismaila, sina Ismaila, i Husejn-paše, sina Saliha. Dogovoren je vjenčani dar u iznosu od 4.000 akči, te je brak sklopljen 3. safera 1238. po H/8. novembra 1822. godine. Svjedoci: Omer Alemdar Bukurević i Bego.“

Husejn Smolo iz Papratnice i Aiša Kadrić iz Seoče

„Suprug Husejn, sin Saliha, Smolo iz Papratnice, nahija Zenica, kojeg zastupa njegov otac Salih, ponudio je brak prethodno neudavanoj i punoljetnoj budućoj supruzi Aiši, kćerki Omera, (Kadrić) iz Seoče, nahija Visoko, koja lično prisustvuje. Na obostrano zadovoljstvo dogovoren je vjenčani dar u iznosu 7.000 akči, te je brak sklopljen 1. redžeba 1238. po H/14. marta 1823. godine. Svjedoci: Omer efendi-sudski pisar, Mustafa-paša Lisak, Salih-paša Bilić, Husejn Sejdić iz Mokronoga.“

Osman Hasagić iz Bičera i Hava iz Visokog

„Prvi muž Mustafa-paša Halać je umro, a to je dokazano svjedočenjem. Potom je suprug Osman-spahija, sin Hasan-spahije, (Hasagić) iz sela Bičera, nahija Zenica, kojeg zastupa njegov sin Hasan-spahi-

ja iz istog mjesta, ponudio je brak prethodno udavanoj Havi, kćerki Abdulaha, iz mahale Rosulje, nahija Visoko, koju zastupa Osman-paša, sin Mustafa-paše, Burić iz iste mahale. Njihovo zastupanje je potvrđeno svjedočenjem Osman-paše Ramljaka i Ibrahim-paše Koljen(ovića) iz istog mjesta. Na obostrano zadovoljstvo dogovoren je vjenčani dar u iznosu od 9.000 akči, te je time sklopljen brak. Svjedoci: Abdulah-aga Ajan, Halil-beg Čakalli-zade (Čakalović) iz Radovlja, te ostali.“

Mehmed Brkanić iz Velikih Trnovaca i Šerifa, kći Šaćira, iz Radovlja

„Suprug Mehmed-spahija, sin Ahmet-spahije, (Brkanić) iz Velikih Trnovaca, koji lično prisustvuje, ponudio je brak prethodno neudavanoj i punoljetnoj budućoj supruzi Šerifi, kćerki Šaćira, iz Radovlja, koju zastupa Mustafa-spahija, sin Ibrahim-spahije, (Džino) iz Velikih Trnovaca. Njihovo zastupanje je potvrđeno svjedočenjem Ahmeta, sina Ismaila, Mušića (Mušija) iz Velikih Trnovaca i Ahmeta, sina Ibrahima, Čese iz sela Dobrinje. Na obostrano zadovoljstvo dogovoren je vjenčani dar u iznosu 11.000 akči, te je brak sklopljen 14. muharrema 1239. po H/20. septembra 1823. godine. Svjedoci: Abdulah-aga Ajan, Arif-aga iz Visokog, Salih-aga Kazaz iz Sarajeva, te ostali.“

Bećir iz Sopotnice i Hanifa Hodžić iz Sebinja

„Suprug Ebu Bekr, sin Ebu Bekra iz Sopotnice, nahija Zenica, koji lično prisustvuje, zatražio je brak sa punoljetnom i prethodno neudavanoj Hanifom, kćerkom

Ahmeta Hodžića, iz sela Sebinje, nahija Visoko, koja, također, lično prisustvuje. Na obostrano zadovoljstvo dogovoren je vjenčani dar u iznosu 13.000 akči, te je brak sklopljen. Svjedoci: Hadži Husejn-aga Haseki (Hasečić), Arif-aga, Mula Mehmed Storo iz Sarajeva, Hasan Alemdar Haseki-oglu (Hasečić) Vojvoda, Salih Buzić iz Visokog, Avdija-paša Rehak, Selim-paša Hodžić iz Sopotnice, Osman Duranović iz istog sela, Arif-aga oglu Mula Emin, te ostali.“

Avdija Berbić iz Brežana i Lejla Breščić iz Gore

„Suprug Mula Avdija, sin Velije, (Berbić) iz Brežana, kojeg zastupa njegov otac Velija-paša, ponudio je brak punoljetnoj i prethodno neudavanoj Lejli, kćerki Omer-paše Breščića, iz sela Gora, koja lično prisustvuje. Na obostrano zadovoljstvo dogovoren je vjenčani dar u iznosu 7.000 akči. Svjedoci: Arif-aga, Salih-paša Lopo iz Bištrana i Omer Alemdar Serdar.“

Omer Begić iz Slapnice i Hanifa iz Sarajeva

„Suprug Omer, sin Omera, Bego (Begić) iz sela Slapnica,

kojeg zastupa njegov brat mula Osman, sin Omera, Bego (Begić) iz istog sela, ponudio je brak punoljetnoj i prethodno neudavanoj Hanifi, kćerki Saliha, iz Sarajeva, koja (trenutno) stanuje na Slapnici, a koju zastupa Mustafa Alemdar, sin Ahmeta Age Velagića, iz Slapnice. Njihovo zastupanje potvrđeno je svjedočenjem Ismaila, sina Omera Hadžića, iz Slapnice i Alija-paše, sina Rame, Potu(r)kovića (kasnije Ramić) iz Brežana. Dogovoren je vjenčani dar u iznosu od 13.000 akči, te je brak sklopljen. Svjedoci: Mula Saliha - imam iz Loznika, Salih-paša Hido iz Sarajeva, Hasan-paša Imamović iz Moštra, Alija-paša Halil-oglu iz Liješeva, Ismail Rojo iz Ričice, te ostali.“

Mehmed, sin Mustafa-bega, iz Dolova i Atija kći Hasana

„Suprug Mehmed, sin Mustafa-bega, iz Dolova, kojeg zastupa Hasan-spahija, sin Kadrija-spahije, iz sela Lukovo Brdo, ponudio je brak punoljetnoj i prethodno udavanoj Atiji, kćerki Hasana, koju zastupa njen brat Ibrahim, sin Hasana, uz svjedočenje o zastupanju Omer-paše, sina Mustafe, i Salih-paše, sina Ebu

Bekr-paše. Dogovoren je vjenčani dar u iznosu 5.000 akči, te je brak sklopljen. Svjedoci: Mustafa – sluga suda, Husejn Kabalić, Ebu Bekr-aga Serdar, Hasan Alemdar Vojvoda.“

Ibrahim, sin Mustafe, iz Vrtlišta i Meva Ibrić iz Lipnice

„Suprug Ibrahim, sin Mustafe, (Kozlo), iz kadiluka Zenica, selo Vrtlište, kojeg zastupa njegov otac Mustafa, ponudio je brak punoljetnoj i prethodno neudavanoj Mevi, kćerki Ibrahima, (Ibrić) iz nahije Visoko, sela Lipnica, koja lično prisustvuje. Dogovoren je vjenčani dar u iznosu 7.000 akči, te je brak sklopljen. Svjedoci: imam Mula Abdulah, Vojvoda Hasan Alemdar, Alija Aljbeg, Čehajić Ahmet-aga.“

Ibrahim iz Dragovića i Umihana iz Kolašića

„Nakon što je prvi muž Husejn-paša prije pet mjeseci dao razvod i to posvjedočio, suprug Ibrahim, sin Ibrahima, iz Dragovića, kojeg zastupa Husejn-paša, sin Mustafe, ponudio je brak prethodno razvedenoj Umihani, kćerki Saliha, koju zastupa Salih, sin Hasana, iza Kolašića. Njihovo zastupanje je potvrđeno svje-

dočenjem Limo Salih-paše, sina Salih-paše, i sina Saliha. Dogovoren vjenčani dar u iznosu od 5.000 akči, te je brak sklopljen 21. zilkadeta 1238. po H/6. avgusta 1823. godine. Svjedoci: Čehajić Ahmet-aga i Mustafa Čolić.“

Mijat, sin Ivana, i Marta, kći Petra, iz Poljana

„Suprug Mijat, sin Ivana, iz Poljana, koji lično prisustvuje, ponudio je brak punoljetnoj i prethodno neudavanoj Marti, kćerki Petra, iz Poljana, koja lično prisustvuje. Dogovoren je vjenčani dar u iznosu od 3.000 akči, te je brak sklopljen 25. džumelahirea 1237. po H/19. marta 1822. godine. Svjedoci: Salih Gazdić i Nikola.“

Stjepan, sin Ivana, i Anđa, kći Marka, iz Ratnja

„Suprug Stjepan, sin Ivana, iz Ratnja, koji lično prisustvuje, ponudio je brak prethodno udavanoj i punoljetnoj kršćanki Anđi, kćerki Marka, Skoko iz istog sela, koja lično prisustvuje. Dogovoren je vjenčani dar u iznosu 3.000 akči, te je brak sklopljen. Svjedoci: Arif-aga, njegov sin Mula Emin, Ali-beg iz Moštra, te ostali.

Obradio: dr. Emir Demir

Iz štampe je izašlo novo autorsko djelo dr. Emira Demira pod naslovom:

„STANOVNIŠTVO KAKNJA U OSMANSKOM PERIODU“

„Kakanjci su dobili ono što malo ko ima – iz jedne knjige mogu dobiti relevantne podatke o imenima i prezimenima svojih predaka, kao i svim pojedinostima vezanim za njihov nastanak i promjene. Pored toga, dr. Demir je javnosti predstavio i podatke o kakanjskim spahijama - vojnom staležu sa veleposjedima, kao i muhtarima, imamima i askerima ovog kraja.“ (Iz recenzije mr. Muharema Omerdića)


Izdavač: Udruženje „Spektrum“ Sarajevo

CIJENA: 15 KM

Narudžbe:

Email: spektrumsarajevo@gmail.com

Mobilni: +38761353525



Fragmenti iz knjige Fuada Breščića „NOSILA TE DOBRINA-Dolinom Trstionice“

Vlč. Branko Karlić (2)

Selo Vukanovići, jedno je od rijetkih u Bosni čiji su žitelji (oko 400 ljudi) preživjeli rat u prisustvu vojske uglavnom druge nacionalnosti.

Vlč. Branko rođen je 16. rujna/septembra 1960. godine u mjestu Goruši, župa Kandija. Pohađao je teologiju u Sarajevu, gdje je i zaređen za svećenika Vrhbosanske nadbiskupije 5. srpnja/jula 1986. godine. Obnašao je službe župnog vikara u župama Novo Sarajevo, Žepče i Maglaj. Od 1990. do 2002. godine bio je župnik u Vukanovićima kod Kaknja te do 2007. u župi Rostovo kod Novog Travnika gdje je i završio svoje svećeničko djelovanje. Preminuo je u Zenici 18. siječnja/januara 2007. godine, u 47. godini života i 21. godini svećenstva. Sahranjen je na gradskom groblju Sultanovići u Bugojnu.

Politika je 1993. godine potaknula iseljavanje Hrvata s područja izvan zacrtanih hrvatskih kantona, uglavnom u srednjoj Bosni. Kako svjedoči katolički svećenik Branko Karlić iz sela Vukanovića pokraj Kraljeve Sutjeske, jedna delegacija mostarskog HVO-a njemu je već u proljeće 1992. godine predložila preseljenje svih Hrvata s tog područja u Hercegovinu i Hrvatsku, puno prije sukoba s Bošnjacima. Karlić je bio iskreno zgranut otvorenosti te inicijative i svojim je posjetiteljima otvoreno rekao da su - đubrad.

– *Takva propaganda doživjela je vrhunac u obećanju da će, onako, za utjehu narodu, kompletan franjevački samostan iz Kraljeve Sutjeske, i to kamen po kamen, prenijeti negdje u okolici Bjelovara. Našla se grupa bezumnika koji su i mene osobno pokušali u to uvjeriti* – prisjeća se Branko Karlić.

S tog je područja doista iseljena većina Hrvata, u sela po Hercegovini (među ostalim, na goljoj ledini podignuta su sela Šuškovno i Bobanovo, koje je Karlić proglasio hrvatskim kolhozima), i jos više u Liku, Kordun i Baniju.

Gostovao je u "Latinici" (HRT), FTV, a u nekoliko navrata intervjuirali su ga pojedine hr.



Vukanovići nekada

novine. Njegovi istiniti i britki komentari i nisu bili baš sa mnogo ljubavi primljeni u katoličkim krugovima. Čitajući ovaj tekst (1993.) može se shvatiti i zašto, pogotovo njegovo zagovaranje ostanka Hrvata u Bosni što je protivno mišljenju pristalica ideje o raseljavanju.

Da, ovo je bila priča o jednom pravom, normalnom Bosancu,

Pokoj mu Vječni!

Ne mogu a da ne napišem jednu zanimljivu i indikativnu priču o tendencioznom informisanju „Slobodne Dalmacije“ iz 1996. godine, lista koji mi je uvijek bio jedan od najistinitijih nedjeljnih novina prije rata, a i sada. Naš lokalni fotograf i kolporter Mirsad Mujagić je na svojoj trokolici od bicikla prvputa dovezao u Kakanj i neke druge novine osim Avaza i Oslobođenja, obradovao sam se mišlju da ću konačno vidjeti šta o nama misle i drugi. Na naslovnoj stranici ugledam svoju rođenu tetku, rahmetli Hanifu, veselo se brčka u improvizovanom banjском lječilištu, kako tamo piše: „Specijalno izviješće iz banje Toplice kod Viteza“. Otvorim srednju duplu stranicu i vidim svoju tetku još na tri slike, a liječila se i kasnije umrla od artritisa, odnosno potpune atrofiranosti zglobova svih udova. Da se nije radilo o banji Tičići, gdje decenijama

ističe topla voda u rijeku Bosnu, pomislio bih da je Lašva postala Bosna, a Kakanj postao Vitez, dok su mi namjere izvještča i autora centralne priče ostale nepoznate.

O vlč. Branku razgovarao sam sa sadašnjim župnikom vlč. Marijanom Brkićem, rođenim u Brčkom i mons. Lukom Tunjićem, više sati. Gospodin Marijan, govoreći o vlč. Karliću nije mogao ne reći i nekoliko već nabrojanih činjenica o Vukanovićima. Misli da se u Vukanovićima teško može vratiti još poneki stanovnik ovog lijepog sela, ali ni on kao i ja ne gubi nadu u neka povoljnija vremena i zašto ne i čuda? Kad sam otišao iz crkve, putem mejla dobio sam najbolju do sada meni poznatu priču, onako iz srca i duše od mons. Luke Tunjića, koju u cjelosti prenosim u knjigu. Ova priča na najbolji mogući način oslikava i bivšeg župnika Branka, kao i povezanost i isprepletenost postojanja sela, planine i ljudi.

Poštovani gosp. Breščiću!

Pokojnog vlč. Branka Karlića poznajem još od 1978. godine iz srednjoškolskih dana. Pohađali smo klasičnu gimnaziju u Dubrovniku koju su vodili svećenici redovnici Isusovci. Branko je bio maturanat a ja prva godina. Na teološkom studiju u Sarajevu smo također proveli tri godine zajedno. Uvijek je bio, na neki

način poseban i osebnajna ličnost. I u školskim i studentskim danima, i poslije kad je postao svećenik, s njim se mogao družiti i prijateljevati samo onaj tko se nije uklapao u običnost, svakodnevnost, površnost... Bio je originalan, svoj... Na svoj način je volio Boga, život, ljude, svoj narod, druge narode, prirodu... Na taj svoj jedinstven način je imao i odnos prema svemu. Zbog toga je često od mnogih bio neprihvaćen, nisu razumjeli da netko može i na drugačiji način živjeti i voljeti, o tome javno i bez zadržke govoriti. Nije se bojao izreći svoj stav i mišljenje i o najosjetljivijim stvarima, bez obzira kako će to netko protumačiti. Bio je svjestan da takav odnos stvara čak i neprijatelje. Njemu očito nije bilo stalo, hoće li ga zbog toga netko prihvatiti i voljeti ili odbaciti. O bitnim stvarima je govorio jasno, decidno i beskompromisno, opet bez obzira na cijenu. Nije to plod naivnosti i neznanja. Znao je o životu, ljudima, mentalitetu i ljudskoj naravi i previše da ne bi bio svjestan posljedica. Ali ljubav i istina kako ju je on vidio nisu imali cijenu i alternativu. S tim se nije cjenkao ni s kim, pa čak i najvećim autoritetima. Dobro je poznao povijest, posebno našu bosansko-hercegovačku. Iz nje je izvlačio onu kontinuiranu nit dobra, plemenitosti, istinoljubivosti, tolerancije, solidarnosti... Znao je da upravo bez te niti i beskonačnog veza-tkanja, naša stvarnost brzo počne tkati suprotne osjećaje koji za plod imaju mržnju, zlo, rat, ubijanja koja ne daju napredak više generacija. Znao je da nam se to u povijesti često događalo, pa je zbog toga to htio spriječiti ili kad se već dogodilo barem umanjiti. Puno je toga uspio. Mnogo je svjedoka koji će to u kakanjskoj općini i šire posvjedočiti. Vjerujem da ga je česta usamljenost u nastojanjima razdirala što se poslije osjetilo i na njegovom zdravlju i preranoj smrti. Rijetki će to uočiti i priznati jer bi se mogli osjetiti i sukrivci jednom prerano ugašenom plemenitom, mladom i od mnogih nerazumljivom životu.

(Nastaviće se)

BESPLATNI MALI OGLASI

Besplatne male oglase možete poslati sms porukom: 061/362-654 i na e-mail: kakanjske@gmail.com

Nekretnine

- Prodajem jednosoban stan u S-1 (soloter) površine 35+2 kvadrata. Tel: 061-808-449 ili 061-417-685;
- Kuća na prodaju u blizini Željezničke stanice. Tel: 065-983-090;
- Prodajem garažu kod Konzuma. Tel: 061-740-779;
- Prodajem zemljište površine 1726 kvadrata u Brežanima – Bistrik. Parcela se nalazi pored puta u neposrednoj blizini osnovne škole 'Omer Mušić', pogodno za gradnju, posjeduje sve priključke.

Tel: 062-913-513 ili 061-273-903;

- Prodajem 11,5 dunuma zemlje na Nišićima – Crna Rieka, povoljno. Tel: 063-454-680;
- Iznajmljujem dvosoban stan na prvom spratu u Ulici Branilaca grada br.10 Stan je u savršenom stanju: klima, balkon, blindo vrata, video nadzor, internet. Cijena 250 KM. Tel: 061-162-382;
- Prodaje se kuća i okućnica nedaleko od grada, papiri uredni 1/1. Tel: 065-983-090;
- Prodajem građevinsko zemljište na Milama površine 880 kvadrata, pola parcele zasadene voćke, prilaz sa asfalta, papiri uredni 1/1, katastarski broj parcele 1980., u blizini 2-3 metra nalazi se struja, voda, kanalizacija, telefon...

Tel: 061-986-452;

- Prodajem kuću i pomoćne objekte u užem dijelu grada, površine 1500 kvadrata. Kuća posjeduje sve priključke, te dva odvojena ulaza, papiri 1/1. Tel: 061-986-452;
- Prodajem ili iznajmljujem poslovni prostor od 39 kvadrata u ulici Rudi Čajevac bb, iznad Osnovne škole Mula Mustafa Bašeskija, prostor je pogodan za sve namjene. Cijena po dogovoru. Tel: 061-617-476;
- Iznajmljujem poslovni prostor u Kaknju, adaptiran, na odličnoj lokaciji, ulica 311. lahke brigade. Tel: 061/683-414;
- Mijenjam novu kuću sa centralnim grijanjem i zemljom za stan od 50-55 kvadrata bez naknade. Uslov da je stan u dobrom stanju i da nema ulaganja. Kuća je u gradskom dijelu na Vardi. Tel: 062-669-012;
- Prodajem parcelu površine 500 kvadrata, na Ivnicu u vikend naselju pored rijeke. Tel: 062-402-578;
- Prodajem kuću u Povezicama pored prodavnice, kuća je sa dva stana, posjeduje sve priključke, useljiva. Tel: 061-424-159 ili 063-337-196;

Vozila

- Tiguan dizel 2,0 TDI 103 KW model 2013., crni-metalik, uvezen, plaćeno

svedo registracije, full oprema. Top stanje. Cijena 23850 KM.

Tel: 061-162-382;

- Turan dizel 1.9 TDI 77 KW/105 KS odel 2007., automatik, full oprema, nove zimske gume, urađen servis, garancija. Cijena 6990 KM. Tel: 062-787-968;
- Prodajem traktor marke Tomo Vinković 18 KS. Tel: 062-902-492;
- Seat Ibiza 1.9 dizel 74 KW, model 2008., tek registrovan. Tel: 062-902-492;

Usluge

- Vršim unutrašnje uređenje stanova i kuća, moleraj, gletovanje, edelpulc, postavljanje laminata, sve radimo vrlo povoljno i kvalitetno. Tel: 062-060-394;
- Pravim sve vrste tapaciranog namještaja, popravljam sve vrste starog namještaja, ugrađujemo kuhinje i sve vrste pločastog namještaja. Tel: 061-584-779 ili 062-944-747;
- Europsko-certificirani maser nudi usluge masaže i kiropraktike. Tel: 061-093-136;

Ostalo

- Prodajem betonsku garažu, garaža se nalazi iza Real centra. Tel: 061-740-779;
- Prodajem med livada/bagrem. Tel: 062-980-845.

Vršimo sve popravke LED i LCD plazma televizora, kao i prodaju istih



Za sve informacije obratite se u RTV servis „Spanić“ u ulici Alije Izetbegovića, Soliter 3. Tel: 061-410-362 ili 032-554-992


KRIŽALJKA SA PREČKAMA (TARABAMA)

IVICA PEKIĆ - PEKIVI -

VODORAVNO:

1. Gatalina ili kreketalo; 14. Tvornica žarulja (skraćeno); 16. Pripadnica indoevropskih naroda (italici); 17. Pleamička titula po rangu niža od grofa; 18. Čvrsto agregatno stanje vode; 19. Žbunasto drvo, raste na vlažnom zemljištu uz rijeke; 20. Kratica za mesenđer (poruka); 21. Krivično djelo protiv časti, usmeno ili pismeno; 22. Ratna rezervna (skraćeno); 23. Proizvod imitacije; 25. Stanovnici Eritreje; 26. Hrvatski glumac i reditelj (Anton); 27. Ime slavne ruske klizačice u umjetničkom klizanju (Rodnjina); 28. Hemijski elemenat simbola (Er); 30. Ime od milja bivšeg nogometaša FK Rudar Kakanj, Tomislava Miškulina; 32. Par osoba; 34. Francuski arheolog, historičar umjetnosti - Apolo (Salomon 1858-1932); 35. Zabava, igranje; 36. Vrsta nogometa naročito u Americi; 37. Mlado muketalo (Mučalo); 38. Kratica za «To jeste»; 40. Kratica za atletski sportski klub; 42. Industrija građevinskog materijala (skraćeno); 45. Naziv za vrijeme u osmanlijsko doba (množ.); 47. Parno kupatilo (franc.); 49. Američka visoravan; 50. Ptica koja zna da govori; 55. Otok na Jadranu spojen mostom sa kopnom; 57. Oblog oblika, zaobljeno; 58. Pogrdan izraz za balavu djecu; 59. Sredstvo za pranje suđa (u prahu); 60. Radi na rototisku; 62. Talijanska pjevačica i voditeljica na Rai; 65. Kad snese jaje kokodače (kokodakalo); 66. Ime stare američke filmske glumice (Gardner); 67. Vrsta roktala papkara; 68. Lijepa ptica, malo cvrkutalo

| | | | | | | | | | | | | | | |
|----|----|----|----|----|----|----|----|----|----|----|----|----|----|----|
| 1 | 2 | 3 | 4 | 5 | 6 | 7 | 8 | 9 | 10 | 11 | 12 | 13 | 14 | 15 |
| 16 | | | | | | 17 | | | | | | 18 | | |
| 19 | | | | 20 | | | 21 | | | | | | 22 | |
| 23 | 24 | | | | | 25 | | | | | | | | |
| 26 | | | | | 27 | | | | | 28 | | 29 | | |
| | 30 | | 31 | | | | | | | 32 | 33 | | | |
| 34 | | | | | | | | | | 35 | | | | |
| 35 | | | | | | | | | | | 37 | | | |
| 38 | 39 | 40 | | 41 | | | | | | 42 | 43 | | | 44 |
| 45 | | 46 | | | | | | | | 47 | | 48 | | |
| 49 | | | | | 50 | 51 | 52 | 53 | 54 | | | 55 | 56 | |
| 57 | | | | 58 | | | | | | | | | | |
| 59 | | | 60 | | | | | | | 61 | | | | |
| 62 | | | | | 63 | 64 | 65 | | | | | 66 | | |
| 67 | | | | | | 68 | | | | | | | | |



USPRAVNO:

1. Peradarstvo; 2. Kratica za atribut; 3. Stanovnica Babilona; 4. Pribor za rad (množ.); 5. Kratica za košarkaški klub; 6. Nicati, povećavati visinu; 7. Član muzičke grupe «Regine» (Davor); 8. Ğaur (turc.) nevjernik «hrišćanin», onaj koji ne pripada muslimanskoj vjeri (množ.); 9. Naše ime njemačkog porijekla; 10. Rođendanski kolač; 11. Napraviti (pokvariti) bez reda; 12. Šljunak, sitan kamen, tucanik (njem.); 13. Četa, bataljon, puk, mnoštvo, parada, pompa, svečama povorka (turc.); 14. Trećerazredan (lat.), pripada tercijeru; 15. Mlado rzalo; 20. Masovan pokolj, masovno ubijanje, krvoproliće (franc.); 24. Poznati nogometni sudija i vrstan poznavalac nogometnih pravila iz Dubrovnika (Hrvatska) (Beusan); 29. Svrđlo za električnu bušilicu; 31. Počasni naziv za velike majstore (muzike i umjetnosti) učitelj, vještak, umjetnik, prvak; 33. Naše poznato osiguravajuće društvo; 39. Podzemno sklonište nekih dlakavih štetočina (lisica, jazavac); 41. Vrsta borilačke vještine šakama i nogama; 43. Svirači na gajdama; 44. Poznato njakalo dugih ušiju; 46. Luka i glavni grad pokrajine na jugu Švedske; 47. Industrijska pokrajina u Njemačkoj i rijeka u Francuskoj i Njemačkoj; 48. Nije siguran nastup ili realizacija nekog nesigurnog zadatka (u pitanju je); 50. Jedan od šahovskih završetaka; 51. Telefonski poziv; 52. Ona pliva i kvače; 53. Aeroplan, zrakoplov, vazduhoplov; 54. Ona pliva i gacke; 56. Rijeka i savezna država USA između Misisipija i Misurija, gl. grad De Moin; 57. On bleji i ima rogove; 60. Kubanski političar (Raul); 61. Uzdignuto mjesto u crkvi za hor i orgulje, grupa pjevača, višeglasna vokalna kompozicija; 63. Auto oznaka za Split; 64. Vrsta peršuna - Akuzativ

RJEŠENJA:

IME I PREZIME:

ADRESA:

NAGRADNI KUPON br. 401

RJEŠENJA IZ PROŠLOG BROJA:

ISPUNJALJKE:
SMREKA
MALA KRIŽALJKA:
TRSKA

Mladost poražena u Bijeljini

Ekipe dobojske Mladosti poražena je u 21. kolu Premijer lige Bosne i Hercegovine rezultatom 3:1 u Bijeljini od ekipe Radnika

Prvo poluvrijeme proteklo je u dominaciji domaćeg tima koji već u 9. minuti



Velić svoj povratak na gol Mladosti neće pamtit po dobrom

preko Milana Vušurovića dolazi do prednosti. Mladost je u 16. minuti imala priliku preko defanzivca Klisure da dođe do izjednačenja, ali je udarac visokog stopera Mladosti odbranio iskusni Luka Bilobrk. U samom finišu prvog dijela meča Milan Vušurović udvostručuje prednost domaćeg tima i sa rezultatom 2:0 se odlazi na odmor.

U drugom dijelu susreta Mladost je sve karte bacila u napad. Tek u 83. minuti Dobojski su došli do gola. Udarac Anela Dedića sa dvadesetak metara u mrežu Bilobrka je skrenuo Alen Dejanović za 2:1. Imala je Mladost još dvije-tri prilike da izjednači u ovom susretu, ali kazna za promašaje stigla je u sudijskoj nadoknadi. Veliku grešku na polovici svog tima pravi Anel Dedić kojem loptu krade Ermin Huseinbašić i matira Velića za 3:1 i veliku pobjedu tima iz Semberije.

Ovom pobjedom Radnik se izjednačio na tabeli sa Mladosti i imaju po 19 osvojenih bodova. U opasnoj zoni, odnosno zoni ispadanja su za sada Olimpik na 11. mjestu sa 16 bodova i Krupa na posljednjem mjestu sa 14 osvojenih bodova. Upravo je Krupa naredni rival Mladosti u Doboju u okviru 22. kola Premijer lige

Bosne i Hercegovine.

Vrijedi istaći kako je u ovom meču na голу Mladosti bio Emil Velić, povratnik u Doboju. Svoj povratak na gol Mladosti neće sigurno pamtit po dobrom jer je primio tri gola. Šta će biti sa jedinicom Mladosti u nastavku sezone, ostaje nam da vidimo, jer se ponajbolji igrač Mladosti, golman Semir Bukvić, dojučerašnji zamjenik kapitena uopšte nije našao na spisku putnika za Bijeljinu.

Rudar poražen u Čapljini



Iako su poraženi, zeleno-crni su ostali u vrhu tabele

Nakon gotovo tromjesečne pauze, nastavljeno je takmičenje u Prvoj ligi Federacije Bosne i Hercegovine. Ekipe kakanjskog Rudara je na otvaranju drugog dijela sezone gostovala u Čapljini.

Domaći tim je upisao pobjedu rezultatom 1:0. Ekipe Bećira Mehanovića dominirala je u prvom poluvremenu. Dobre prilike propustio je Hrelja u 9. i 16. minuti, da bi udarac kapitena Belmina Kobilice iz slobodnog udarca krajnjim naporom izbacio golman domaćih u korner u 41. minuti i sa nepopularnih 0:0 se odlazi na odmor.

U drugom dijelu susreta Rudar nije uspio ozbiljnije da ugrozi gol domaćih koji su iz "gužve" u šesnaestercu došli do pobjede u 71. minuti preko Dejana Popovića koji je uspio matirati Amira Bekana za veliku pobjedu Čapljine od 1:0.

Iako su poraženi, zeleno-crni su ostali u vrhu tabele. Prvo mjesto dijele ekipe Posušja i Toška sa 31 bodom, dok je Rudar treći sa 30 osvojenih bodova. U narednom kolu Rudar će na stadionu Pod Vardom ugostiti Radnik iz Hadžića.

Iskoristite akciju na našem web shopu od 15% popusta na WAYA kapi za uravnoteženu crijevnu mikrofloru

WAYA®
PROBIOTIČKE KAPI
KAPI ZA URAVNOTEŽENU
CRIJEVNU MIKROFLORU

-15%

Proizvodi WAYA® ne sadrže alergene kao što su mliječne bjelancevine, jaja, gluten, laktoza, orašasti plodovi...





Kuglaši Rudara u sjajnoj formi

Kuglaši kakanjskog Rudara nastavili su sa serijom pobjeda. U derbiju 17. kola kuglaške Premijer lige BiH ekipa Rudara je u dvorani KSC Kakanj savladala drugoplasiranu Revitu iz Banjaluke rezultatom 5:3.

U prvoj izmjeni je bivši kuglač Rudara, Muamer Bešić (596) za Revitu osvojio poen protiv Amara Alagića (538), dok je rezultat izjednačio Dinko Dundić (559) protiv Slavka Prijića (532).

Druga izmjena donijela je mnogo uzbuđenja kao i prva. Vedad Karzić (542) poražen je od Đorđe Paštara (557), dok je Kemal Karahodžić (572) donio izjednačenje Rudaru protiv Si-



Rudar savladao Revitu u derbiju kola

niše Andrića (524).

Odluka o pobjedniku pala je u posljednjoj trećini meča. Amir Kara-

hodžić (535) je poražen od Mladena Džajića (546), dok je Nermin Hrustemović (588) oborio mnogo više čunjeva od svog protivnika Vladimira Gurešića (541) i donio vrijednu pobjedu kakanjskom timu rezultatom 5:3. U konačnici je Rudar imao 38 čunjeva više od banjalučkog tima (3334:3296).

Sa nova tri boda ekipa Kaknja je na diobi trećeg mjesta sa banjalučkim Borcem sa 31 osvojenim bodom. Druga je Revita sa 34, dok ka novoj tituli prvaka BiH juriša Posušje koje je u dosadašnjih 17 kola upisalo samo jedan poraz. U narednom kolu kuglaši Rudara gostuju u Bileći, a za protivnika će imati ekipu Hercegovca.

Novi poraz košarkaša Kaknja

Košarkaši Kaknja upisali su novi poraz, petnaesti u sezoni. Leotar je na domaćem terenu savladao tim Benjamina Šabića rezultatom 104:83 u okviru 20. kola košarkaške Premijer lige BiH.

Prva četvrtina donijela je dosta uzbudljivu košarku, uz čak 65 postignutih poena (36:29). Ekipa Kaknja uspjela je do odlaska na odmor anulirati prednost izuzetno raspoložениh košarkaša Leotara (51:51), ali u nastavku za iznenađenje košarkaši Kaknja nisu imali snage, ali ni širine na klupi.

Treći period igre domaći su dobili rezultatom 24:13, da bi u posljednjih 10 minuta susreta ušli potpuno rasterećeno i slavili sa 104:83.

Vladimir Aleksić je sa 22 poena i šest skokova vodio domaći sastav do pobjede,



Kapiten Muflizović ubacio čak 34 poena u duelu sa Leotarom

a sjajno su bili raspoloženi još Božo Đurasović sa 19 i Stefan Mijović sa 17 poena. U ekipi Kaknja kapiten Aldin Muflizović je postigao 34 poena, dok je 18 dodao centar Miloš Pajović.

Ovo je ekipi Kaknja bio čak petnaesti poraz u sezoni i po svemu sudeći naredne sezone ekipa Benjamina Šabića igrat će u drugom razredu bh. košarke. U narednom kolu Kakanj će ugostiti banjalučki Borac, a ovaj susret se igra za vrijeme pripreme ovog broja novina.

Čelik slavio u komšijskom derbiju

U komšijskom derbiju 13. kola Prve rukometne lige Federacije BiH – grupa Sjever, ekipa zeničkog Čelika slavila je u Kaknju protiv istoimenog protivnika rezultatom 37:27.

Gosti su u potpunosti opravdali ulogu favorita u ovom duelu i odnijeli vrijedna tri boda koja su ih ostavila u borbi za sami vrh tabele i promociju u Premijer ligu BiH. Sudijski dvojac Kalabušić-Smajlović nije imao pretjerano mnogo posla u ovom duelu. Dosudili su šest sedmerača, dva za domaće (1/2) i četiri za gostujuće igrače (4/4), dok su pokazali pet isključenja, jedno za ekipu Kaknja i četiri za Čelik.

Gosti su nošeni sjajnom igrom Gušića i Begagića prvi dio susreta riješili u svoju korist rezultatom 17:13, a prednost zeničkog tima u ostatku susreta rasla je iz minuta u minut. Na kraju su gostujući rukometaši upisali vrijedan trijumf rezultatom 37:27.

Zeničane su do pobjede vodili Edin Gušić sa osam, te



Zaimović u drugom dijelu sezone igrač-trener

Aldin Begagić i Edvin Begović sa pet postignutih golova. U ekipi Kaknja najviše golova je postigao Nedžad Zaimović. Igrač-trener Kakanjaca je susret završio sa šest golova. Pet je dodao Muaz Kusić, dok su po četiri postigli Salih Delić i Tarik Kubat.

Ovo je ekipi Kaknja bio sedmi poraz u nizu i sada sa 15 bodova zauzimaju osmo mjesto na tabeli. U narednom kolu ekipa Nedžada Zaimovića gostuje u Cazinu kod posljednoplansirane ekipe Krajine. Susret se igra za vrijeme pripreme ovog broja novina, a izvještaj vam donosimo u našem narednom broju.

Tuka peti u Torunu

Najbolji bosanskohercegovački atletičar Amel Tuka osvojio je peto mjesto u finalu trke na 800 metara na Evropskom dvoranskom prvenstvu u Torunu. Tuka se lako domogao finalne trke u kojoj nije mogao do postolja.

Utrku je bh. atletičar završio sa vremenom 1:47.37, a slavio je Patryk Dobek sa vremenom 1:46.81, dok je Mateusz Borkowski završio drugi sa vremenom 1:46.90. Bronza je otišla u ruke Jamieja Webba.

Iako je utrku završio kao petoplasirani, Tuka je ista-



Najbolji bh. atletičar zadovoljan ostvarenim

kao kako je zadovoljan ostvarenim.

"Prije svega, želim da se zahvalim svima na velikoj

podrški koju mi pružate cijelo ovo vrijeme, a posebno tokom dvoranskog prvenstva. Uvijek ste mi bili dodat-

ni vjetar u leđa. Jako sam zadovoljan zimskim dijelom sezone i rezultatima. Sve trke sam odradio iz velikih baznih treninga koji će prave rezultate dati tek u ljetnom dijelu sezone. Ostvario sam oba zacrtana cilja, a to su rekord BiH i rekord Balkana (1:45.95) i plasman u finale Evropskog prvenstva u dvorani. Čeka me mnogo rada i spreman sam da odgovorim na nove izazove i da ponosno predstavljam svoju BiH", rekao je najbolji bh. atletičar nakon dvoranskog prvenstva u Torunu.

Za Amela nema mnogo odmora jer slijede pripreme za najveće takmičenje na planeti, Olimpijske igre na kojima naš atletičar ima visoke ciljeve.

**FRIZERSKI SALON
HARDY**

LADIES

GENTLEMAN

Alije Izetbegovića 16,
72240 Kakanj

+387 (0) 61 / 853 - 522

KROMPIR SJEMENSKI AGRIA
25 kg

25kg

25.80 KM

Račun i garancija

Besplatna dostava! Za narudžbe iznad 100 KM

BAUCENTAR.ba SIGURNA ONLINE
BY TRGOŠPED KUPOVINA

Iz široke ponude sjemena izdvajamo krompir sjemenski agria 25 kg po cijeni od 25,80 KM Posjetite nas na adresi Rudarska bb, Kakanj



„AGRO-VRT“ – SVE ZA PROLJEĆE!!!

SJEMENSKI I SADNI MATERIJAL:

- Sjemenski krompir (Agria, Kondor, Desire, Riviera, Monalisa, Madeline...)
- Sjemenski luk (Štutgarter, Ptujski crveni, Majski srebrenjak...)
- Sadnice drvenastog voća (jabuka, kruška, šljiva, breskva, trešnja...)
- Sadnice jagodičastog voća (malina, kupina, borovica, ribizla...)
- Sadnice ruža
- Lukovice cvijeća
- Sjemenske kesice povrća, cvijeća, začina



VRTNI PROGRAM:

- Sadilnici
- Rukavice
- Lopate i ostali alat
- Leđne prskalice
- Folija za plastenik
- Folija za jagode
- Crijevo za navodnjavanje



Proljetna akcija sadnice oraha

PROGRAM ZA PČELARSTVO:

- pogače za pčele
- hranilice
- pčelarska odijela
- pčelarske jakne, šeširi, rukavice
- LR nastavci (sa i bez ramova)
- dimilice
- matične rešetke



ZOO HOBY PROGRAM:

- Hrana za kućne ljubimce
- Ogrlice i povodci
- Šamponi
- Igračke, grickalice, slatkiši

Za sve informacije obratite nam se na našoj adresi:
Ulica Alije Izetbegovića, lamela NIZ-A, prizemlje bb, Kakanj
Ili putem Tel/fax: 032/559-969
Mob: 061/976- 833; 061/416-834
E-mail: agro_vrt@yahoo.com